

SSH
Current
Shelves
DU
740
A2
W3
v. 1572

Wantok
SSH Current Shelves
UC San Diego
Received on: 09-27-04

WANTOK

Wan Wik, Septemba 2 - 8, 2004 NIUSPEPA BILONG YUMI OL PNG STRET NAMBA 1572 K1.00 TASOL

Ples i hot

INSAIT

Las mama lo bilong Bogenvil

PES 2

Somare singaut long gutpela sindaun

PES 3

Ol Katolik tisa kisim kos

PES 10



Hillsong singers bilong Australia i redi long PNG

PES 20

Lukim ol NRL nius

PES 28 - 29

... na solwara i kirap

Veronica Hatutasi i raitim

OL KANTRI i mas redi long mekim samting taim bikpela hevi i kamap na bagarapim ol kaikai, helt na ol samting we bodi i save kisim long stap laip.

Dokta Keneti Faulalo em

Envaronmen Program menesa wantaim Yunaitet Nesens i mekim dispela toktok long bung bilong ol Pasifik na Esia lida long Fiji.

Bikpela toktok long dispela konferens i sut long ol liklik ailan kantri na bagarap i bungim ol we solwara i

bruk i kam, bikpela win na tait i kamap na bikpela drai i kamap. Ol toktok i kamap long painim gutpela rot bilong pipel i helpim arapela na stretim ol bagarap we inap kamap.

Senis i wok long kamap long wol long weda o taim bilong san, ren, win na hot na kol i kamapim bikpela wari long planti kantri long wol.

Na dispela senis i wok long kamapim wari moa yet long ol

Pasifik kantri we solwara i wok long solap kam antap na karamapim sampela ol liklik ailan.

Ol dispela senis long weda i kamap em ol i kolim long Global warming o ples graun i hot. Na em i kamap bihainim ol ges na smok bilong planti ol fiul we i go antap pulapim skai. Na skai i nogat strong long banisim ol strongpela lait na hot we i kam insait long ples graun. Na tu, ol i rausim planti diwai na bikbus samting we i save lukautim na holim pasim graun, ol samting i stap insait na ausait na tu, ol pipia bilong ol maining bisnis i bagarapim ol wara na solwara.

Solwara long Pasifik i wok long kamap hot na dispela i kamapim taitwara, na bikpela drai long ol longwe ples olsem long Afrika na tu, kamapim ol bikpela klaut i pairap, win na ren long Kalifonia na ol hap bilong Amerika.

Dokta Faulalo em wanpela palamen memba bilong Japan long dispela wik i tok taim i wok long sot long wol long mekim samting kwiktaitim long hevi bilong weda o win na san we i wok long go narakain. Ol taitwara na taim bilong bikpela san na drai we i no save kamap bipo i wok long kamap nau.

Em i tok long dispela sama o taim bilong san long Japan, kantri i kisim taim long bikpela hot we i abrusim mak i go long 40 digris Selsius long mak bilong rekotim level bilong hot na kol.

"Dispela mak we ples graun i wok long bungim senis long ol samting em i narakain na i no save kamap bipo," Yoshio Yatsu em memba bilong palamen bilong Japan i bin tokim Esia Pasifik konferens long Envaronmen na Dvelopmen.

Mista Yatsu i tok ol liklik ailan kantri i bungim hevi moa global woming o bikpela tuhat o hot i mekim solwara i solap na karim ol graun na ol liklik ailan i go wantaim bikos planti long ol em mak bilong graun i stap level wantaim solwara.

i go moa long pes 2

Polis bai wok strong nau long Bogenvil



• Em ol nupela polismanmeri i redi nau long go pas long wok bilong lo na oda insait long Bogenvil. Wantaim ol polismanmeri bilong Australia bai ol i strongim wok bilong stretim gut ples na kamapim gutpela sindaun insait long komyniti na lukim lo i wok gut gen long kirapim ples na provins olgeta. Nau ples i wok long kamap gut tru bihain long 10-pela yia olgeta ol pipel i stap long hevi.

FATHER'S DAY
Brian Bell
Shop with a friend

TINGIM
DEI BILONG PAPA
SUNDAY
SEPTEMBER 5
2004

BBQ
PACK BILONG
WINIM
WANWAN LONG
OL BRANCH

FOOD
HAMPER

WINIM BBQ
PACK BILONG PAPA!

SPENDIM K20.00, KISIM ENTRI FOM,
RAITIM NEM NA ADDRESS NA GO INSAIT
LONG DRO BILONG WINIM BBQ PACK
BILONG PAPA!

- BBQ PACKAGE IGAT:
- 1 X 4 BURNER BBQ WITH TROLLEY
- 1 X 4.5KG FULL GAS CYLINDER
- 1 X COLEMAN 36 QT CHEST COOLER
- 1 X TRAMONTINA BBQ UTENSIL SET
- 1 X FOOD HAMPER

Promosen bai pinis August 31st, 2004. Dro bai kamap Sarere September 4th, 2004.

POLIS RIPOT

Daru: DARU taun insait long Westen provins i bungim hevi bihainim ol trabel i bin kamap las wik.

Wanpela man i stap long haus sik wantaim bikpela bagarap long bodi bilong em, ol i no painim tupela, 4-pela narapela i stap long haus sik tu wantaim ol bagarap na 41 haus em ol i kukim pinis. Ol dispela hevi i kamap bihainim pait namel long pipel bilong tupela pleslain em Masingara na old Mawata. Tupela ples i stap long Daru Ailan.

Bosman bilong ol Polis long Sauten Rijen na Ekting Asisten Polis Komisina Inspekta John Marru i bin tok pait i bin kamap long las Fraide, namel long tupela ples na as bilong dispela em long kukim kanu. Dispela hevi i bin kamapim prèt pasin long taun long wanem ol lain i biruaim wanpela narapela bin bagarapim planti samting insait long taun.

Ol bin salim 9-pela polis man bilong Sauten Koman Task Fos long Daru bilong helpim stretim dispela hevi.

Inspekta Marru i tok hevi i bin bruk taim wanpela yut i bin kukim kanu bilong wanpela man Masingara.

Em i tok ol pipel bilong Masingara i bin peim bek taim ol i sutim yangpela bilong Mawata na kamapim bikpela bagarap. Ol bin kisim dispela yangpela i go long haus sik long Kwinlen, Australia.

Finsafen: KOMYUNITI long Finsafen insait long Morobe provins i bin paitim idai wanpela raskol na holim pasim na givim tupela i go long han bilong polis. Narapela tupela i bin kisim taim long bunara na naip tasol ol i ronawe.

Polis ripot i kam long Lae i tok ol manmeri long Finsafen i les pinis long pasin bilong ol raskol husat i pretim na kamapim birua na hevi long ol pipel long longpela taim pinis.

Bogenvil pinisim wok long redim Mama Lo

Veronica Hatutasi i raitim

BOGENVIL Konstitusenele Komiti i pinisim olgeta wok long namba tri na laspela draf ripot bilong Bogenvil Mama Lo. Wok long dispela i bin pinis long Ogas 21. Nau ol bai givim dispela laspela draf ripot i go long Baipatisen Nesenele komiti long lukluk, glasim na skelim bipo em i givim i go long Kabinet long tok oraitim.

Inta Gavman Rilesens na Bogenvil Afeas Minista Sir Peter barter long dispela wik i bin etvaisim ol Bogenvil lida olsem Kabinet i tok oraitim Nesenele Gavman long kontribusen bilong peim Bogenvil Konstituen Asembli.

Sir Peter i tok insait long tupela wik i kam, Baipatisen Nesenele Komiti bai lukluk long draf Bogenvil Mama Lo taim em ol

ligel na teknikel etvais na pinisim olgeta wok long fainol draf ripot.

Minista wantaim ol narapela minista na ol sinia gavman woklain i bin bungim Gavana bilong Bogenvil John Momis, Presiden bilong Bogenvil Pipel's Kongres Joseph Kabui na ol arapela sinia opise long Buka las Fonde bihain tasol long NEC bung long Kokopo na ol i toktok long dispela samting.

Sir Peter i bin tok disisen bilong Nesenele Gavman long katim mani long kirapim na sapotim wok bilong Bogenvil Konstituen Asembli na helpim long ol arapelarot long kirapim otonomi gavman na tu, bikpela lain Minista na sinia gavman opisa i go long Buka i soim bikpela

tingtign bilong gavman long inapim ol samting i stap insait long Bogenvil Pis Agrimen na ol lo we i givim strong long dispela agrimen i kamap aninit long Mama Lo bilong PNG.

Sir Peter i askim ol Bogenvil patna long givim inap taim i go long Nesenele Gavman na Baipatisen komiti i lukluk long dispela namba tri na fainol Bogenvil Mama Lo draf ripot bipo em i givim tok orait bilong em.

Sir Peter i tok amamas long wok bilong lusim na bagarapim ol gan long Bogenvil i go gut.

Em i askim strong ol lain long Bogenvil long pinisim dispela wok na ileksen bilong sanapim otonomi gavman i ken kamap.

.....Nesenele gavman bai glasim

FM 100 opim program bilong daunim korapsen

GUTPELA gavanens o gat gutpela gavman we bai givim gutpela lukaut stia long kantri na pipel, stopim korapsen o pasin bilong paulim na yusim nogut lidasip posisen na pablik mani long helpim yu yet o poroman, famili na wantok em ol samting we pipel insait long kantri i laikim long helpim ol go gut long laip, sindaun na lukim ol gutpela wok kamap long olgeta eria.

Tasol PNG i wok long bagarap na bungim hevi long mani i sot, lo na oda, ol raskol pasin, sefti na sekyuriti bikos long korapsen na nogat gutpela gavanens.

Bihain long planti toktok long ol dispela samting, FM 100 redio Tokbek So i kirapim gutpela gavanens na anti korapsen program long dispela wik.

Britis hai Komisina i bin givim K67,000 i go long FM100 long kirapim na ranim dispela program long wanpela yia.

Ekting Hai Komisina Alester Dent taim em i givim sekmani i go long Ekting Menesing Dairekta Peter Tareasi i bin tok PNG bai

daunim dispela hevi long korapsen na hevi long gutpela gavanens taim ol pipel i gat save na ol i klia wanem samting tru em korapsen. Na wanem samting ol i ken mekim long helpim sapotim dispela i kamap.

Planti olo bikman husat i stap insait long Nesenele Frod na Anti Korapsen grup i bin stap long lons bilong dispela Gutpela Gavanens program.

FM100 redio stesen bai holim ol Tokbek So program we i sut long dispela samting na givim aut ol infomesen i go long pablik. Long wankain taim tu, em bai kisim ol tingting bilong pablik na ol i ken wokim dispela long ring long telipon na autim tingting bilong ol. Mista Dent i bin tok taim ol pipel i save long wanem samting tru em korapsen; olo bai sanap long gutpela posisen long daunim na abrusim.

Em bin givim piksa long ol kantri olsem Botswana long Afrika, Hong Kong na Singapo we i daunim dispela hevi bikos long pablik aweanes we media i karimaut long ol dispela kantri.

Ples i hot na solwara i kirap

...I kam long pes 1

Narapela samting em ol ges o smok we i save kamapim "Greenhouse effect o global warming" em ol bikpela kantri i save kamapim na i no ol liklik ailan kantri long Pasifik. Tasol ol dispela liklik ailan i kisim taim long en.

Na dispela bung i

wok long lukluk long ol rot bilong traim kamap wantaim sampela tingting na rot bilong helpim ol pipel long taim nogut.

Long Papua Niugini nau em hap bilong Mendi long Sauten Hailans provins i bungim drai taim nau we ol wara i drai.

Na ol wokman

bilong Nesenele Disasta Opis i tokaut olsem insait long tupela o tripela mun bihain bai i gat drai i kamap long PNG. Olsem na nau yet opis bilong ol i wok long mekim plen na glasim ol rot bilong helpim ol pipel wantaim tingting na rot bilong helpim ol yet long taim nogut.

Ol Katolik kisim singaut long sapotim redio

SINGAUT i go long ol Katolik pipel na ol arapela pren insait long PNG na ovasis long sapotim Katolik Redio Netwok (CRN-PNG) long preia na mani wantaim na em bao skruim wok bilong em long ol komuniti na kantri. Interim Siaman bilong CRN-PNG, Bernard Narokobi i bin wokim dispela singaut long lons bilong CRN-PNG Friends Association program las Sande insait long seremoni bilong makim wanpela yia bilong dispela redio netwok.

CRN-PNG i bungim hevi long mani bikos em i kostim bikpela mani long kamapim program na tu, long salim ol toktok i go long olgeta hap bilong kantri. Dispela em bikos ol masin olsem satalait na ol narapela nupela masin long salim gut ol toktok i kostim


bikpela mani tru. Bilong kamapim wanpela program long wanpela de, pe bilong em i K1,000. Olsem na ol lain i go pas long CRN-PNG i bin kamap wantaim tingting na lonsim dispela Poroman bilong CRN-PNG program.

Oksileri Bisop bilong Pot Mosbi Katolik Asdaiosis Cherubim Dambui husat Interim Ko-Siaman bilong CRN-PNG Friends Asosiesen i bin tok olsem Asosiesen i luksave long bikpela kos long ranim redio. Na moa yet, netwok bai i mas i gat satalait long hukim ol. Olsem na tupela bikman ya i bin glasim na skelim ol samting na tok ol i mas gat ol pren long givim helpim na sapot wantaim mani na ol arapela rot long skruim wok bilong CRN-PNG.

Moresby MOVIE Theatre advertisement for 'FINDING NEMO' and 'MASTER & COMMANDER' on Saturday 4th September. Includes showtimes and contact info for Moresby Arts Centre.

Comic strip titled 'TODOR' with four panels. Panel 1: 'LAS TAIM MARDONS ILUS NA TORO INO WANBEL... EM GEM BILONG MIPELA TASOL OL BLUS I KOPIAM STAIL BILONG MIPELA NA OL I WIN! YU WET!!'. Panel 2: 'EM HARIM OLSEM BLUS I LAIK KISIM LAPUN BRET FITLA NA TORO EM WAIL OLGETA... NAU OL IKISIM DISPELA LAPUN FITLA... OIYE! OL I LAIK PRUVIM WANEM TRU, YAH!'. Panel 3: 'EM KIRAP BOROWIM MOBAIL FON BILONG TAMBU BILONG EM... HEY, TAMBU MOBAIL FON IKAM, MILAIK RING YAH! YU LAIK RING I GO WE YAH!'. Panel 4: 'MI LAIK RINGIM WALI LEWIS LONG KAM PILAI LONG THE DORIGIN GEM!'.

Gutpela pasin em i as bilong gutpela sindaun



PNG i lusim tingting pinis long Kapul a? Dispela man kapul tasol i kirapim ai na bel bilong olgeta pipel bilong PNG long sapotim tim bilong PNG long Saut Pasifik Gems hia long 1991. Raun raun bilong Kapul i mekim PNG i redi gut tru long SP Gems we PNG i winim planti medol na kamap top long 1991 SP Gems. Nau yumi lus tingting long bikpela wok em i mekim long kantri. Turangu mipela harim olsem em i hait i stap long bus bilong Abau long Sentrel provins. Em i no raun nating long bus. Nogat. Em i raun olsem polisman na strongim lo na oda insait long Kupiano eria long tude. Sori Kapul, sapos PNG i lusim tingting long yu, *Wantok* i tingim yu.

Mauswara man bilong Yumi FM i laikim *Wantok* i rausim Kanage na kolim narapela nem we em yet bai fada long ol tok pilai. Mipela pret long ol Samarai na Kerema bai winim mipela ol Niugini long tok pilai ya. Yupela ting wanem?.

Papa bilong kantri yet i tokim ol mama taim ol i straik go long opis bilong em dispela wik olsem. Mipela Sepik i save tok, KBS. Kanaka em Bikpela Samting. Dring bia long pasin bilong amamas na kisim win. I no bilong dring long kisim strong na kamap ain man na painim trabel. Ol meri i straik long pasin bilong paitim ol meri na bagarapim ol.

Skin bilong ol wok manmeri long *Wantok Niuspepa* i bin kirap na ol pret nogut tru taim ol i bin lukim wanpela foto we sampela lain i bin salim i kam long intanet we i soim wanpela meri husat i bin go long Saut Amerika na kisim wanpela sik we i bin mekim na ol binatang i bin mekim ol hol long susu bilong en na i wok long suvim het bilong ol i kam ausait. Man dispela photo i bagarapim sindaun bilong mipela stret na bai i mas sampela mun bipo mipela sampela i ken kaikai nuduls gen.

Gavman bai stretim ol rot, bris na laithaus

Michael Novingu i raitim

MINISTA bilong Trensport na Sivil Eviesen, Don Polye, i tokim ol komiti bilong lait haus long Madang olsem ol bris, rot, ples balus, na ol laithaus na ol liklik han rot insait long Madang provins na Papua Niugini i bagarap pinis long bikpela ren na win. Mipela i mas karimaut wok mentenens long stretim ol dispela rot long bringim sevis i go insait long ol asples bilong mipela, Mista Poyle i tok. Dispela i stopim ol ples lain long bringim ol samting bilong ol olsem vanilla, kakao, kopra, pis na ol arapela kes krop i kam salim long taun maket. Dispela i kamapim hangre, sindaun i bagarap na pretim tu ol bisnis investa o man o kampani husat i laik kamapim bisnis long i kam insait long kantri.

Mista Polye i tok dispela em i soim olsem gavman i no wari long ol rurel pipel na tu gavman i nogat strong long stretim ol dispela bikpela sevis bilong dispela kantri. Gavman bilong Somare we mi yet mi ministra i lukautim trenspot na sivil eviesen bai stretim ol dispela bris, rot, ples balus ol han rot i go bek bai i stap gutpela olsem bipo, em i tok. "Olsem dispela projek plen bilong mipela mani mak i sanap olsem K155.85 milien bai mipela i dinau long Esian Developmen Benk long karimaut dispela wok," Mista Polye i tok. Em i go moa na i tok dispela projek mipela i tingting long kamapim gutpela maritaim o ol trenspot sistem bilong ol solwara bilong mipela long wanem mipela i gat ol gutpela marin risos bilong kirapim ikonomi na developmen bilong dispela kantri. Mista Polye i tok gavman bilong bipo ol i lus tingting long ol laithaus insait long kantri na i go bagarap. Nau gavman bilong Somare bai stretim ol dispela laithaus na marinas long strongim ol long kirapim gut ol sevis i go long ol pipel long liklik mani we i daunim hevi bilong painim trenspot.

Barbara Tomi i raitim

PRAIM Minista bilong Papua Niugini, Sir Michael Somare, i singaut long ol mama na papa long stretim o givim disaplin long ol pikinini bilong ol long stopim pasin bilong paitim meri na pikinini na tu bagarapim o reipim ol.

Em i tok disaplin i mas stat long haus na em i wok bilong ol mama na papa long skulim ol pikinini long noken mekim nogut o paitim narapela.

Em i tok tu olsem gavman i no inap mekim lo long disaplinim ol pipel bilong em.

Sir Michael i bin mekim ol dispela toktok bihain long em i bin kisim petisen o ol wari bilong ol meri grup insait long Pot Mosbi long ol pasin nogut o pasin bilong bagarapim ol meri we i wok long i go bikpela long kantri.

"Olgeta man long hia ol i tok ol Kristen tasol insait long bel bilong ol em nogat. Sapos yu tok yu Kristen bai yu i no inap mekim ol dispela pasin nogut long narapela," em i tok.

Antap long disaplin long haus, Sir Michael i singaut tu long kisim bek koporel panisemen long ol skul.

Em i tok bipo taim dispela mekimsave i bin stap long ol skul na ol pikinini i ken save long noken mekim ol bikhet pasin.

Em i tok em i papa na em i gat tripela pikinini meri na em i save wari long wokabaut bilong ol olgeta taim taim ol i liklik yet inap nau ol i bikpela.

Na sapos ol papamama i disaplin ol pikinini long haus na ol tisa i givim strongpela mekimsave long ol sumatin, dispela bai helpim long daunim ol dispela hevi bilong bagarapim olmeri na ol narapela na tu kilim dai man.

"Taim mi raun long Samoa na Fiji na lukim ol manmeri na pikinini i wokabaut long biknait long ol rot na mi save pilim sem stret bilong wanem mipela i no inap mekim dispela kain long hia long PNG," Sir Michael i tok.

"Sapos i gat disaplin i stap long ol wan wan sosel komyniti bilong yumi hia long PNG, kain pasin bilong bagarapim narapela bai i no inap kamap," em i tok.

Wari o petisen bilong ol meri husat i bin mas

long Tabari Ples i go long opis bilong Sir Michael long Mande em:

- Polis manmeri i mas werim ID kat we i soim rejistresen namba na nem bilong ol taim ol i raun mekim wok bilong ol;

- Polis Komisina i mas givim mekimsave long ol polisman husat i bin bagarapim ol seks woka bihain long wanpela reid o taim ol polis i go sekim dispela haus long mun Mas;

- Ol polisman husat i dring bia na mekim wok i mas raus long fos;

- Len Trensport Bot i mas kamapim wanpela bus kampani long ronim ol bas sevis insait long Pot Mosbi;

- Gavman i mas strongim na sapotim wok bilong Humen Raits Komisina; na

- Kamapim wanpela opis bilong ol lain i kisim birua long vailens long polis stesen na haus sik wantaim.

As tingting bilong dispela protes wokabaut em long soim olsem ol meri i les pinis long ol birua ol i save bungim we i save bagarapim tu sindaun bilong ol, na ol i laikim olsem sampela kain helpim i mas kamap nau long luksave long wari na hevi bilong ol meri.

Mak olsem 500 manmeri i bin statim dispela gutpela wokabaut we ol grup olsem City Mission, StopAIDS, Catholic Family Life Apostolate, Mother, Daughter, Sister to Sister Solidarity Group, YWCA, PACE, ICRAF na ol mama grup long setelmen i bin go pas long en.



Sanap Was... Ol polisman i bin mekim wanpela raun insait long Westen provins long bikpela birua o pait we planti haus na ol samting i bagarap na tu ol manmeri i kisim bagarap long laip na sindaun bilong ol. Dispela wokabaut em Minista bilong Inta Gavman Rilesens, Sir Peter Barter, na ol lain bilong em i mekim i go insait long hap we trabel i kamap long en. Ol polis i mekim bikpela wok long daunim trabel na holim ol dispela sotgan long photo we ol man i yusim long mekim trabel insait long komyniti. Dispela em wanpela bikpela operesen we i kamap gut long rausim ol kain birua samting olsem long han bilong ol pipel we i save bagarap laip na sindaun long komyniti.

Kimisopa autim wari long lo oda na Jastis woksop

Sape Metta i raitim

HEVI bilong lo na oda i wok long kamap bikpela tru long wanem yumi i no inap long lukautim ol samting.

Long pasin bilong lukautim ol samting, yumi mas stat long antap na kam daun. Mekim olsem na kantri bilong yumi bai i no inap lukim planti hevi bilong lo na oda na yumi i ken lukim planti senis na gutpela sindaun i ken kamap na ol pipel i ken pilim fri long mekim ol wok bilong ol na wokabaut fri i go i kam.

Dispela em i sampela strongpela toktok em memba bilong Goroka na Minista bilong Polis, Bire Kimisopa, i bin mekim long taim em i kamap lukim bung bilong lo, oda na jastis woksop we i bin kamap long Goroka long stat bilong dispela wik.

Em i tok, olsem minista bilong bikpela opis bilong karimaut wok bilong lo na oda, em i gat bikpela wari tru long sait bilong ol polisman na meri husat i save givim planti taim bilong ol long lukautim na traim hat tru long daunim ol hevi bilong lo na oda.

"Ol i save kisim liklik foitnait pe, tasol wok ol i save mekim long lukautim ol komyniti long hevi bilong lo na oda em i bikpela tumas. Na mi save i gat bikpela wari tru long ol," Minista Kimisopa i tok.

Dispela 'reporting law and order' woksop program we i stat long Mande long dispela wik na bai pinis long tumora (Fraide) em Lo na Jastis Sekta Apros na PNG Midia Kaunsel i kam bung wantaim na kamapim.

Na moa long 20 nius lain na ol pablik rilesen opisa long Hailans ri- jen na Morobe provins i kamap long lainim na kisim trening long pasin bilong raitim gut ol stori na ripot long lo, oda na jastis.

Dispela em namba wan taim bilong kain woksop i kamap long kantri. Na astingting long kirapim dispela woksop na mekim kamap ol kos em:

- Long kisim gut ol infomesen o toktok long sait bilong lo na oda long ol kot haus, polis dipatmen na ol arapela lo na jastis ejensis.

- Long lainim na kisim ol nupela

aidia long raitim ol ripot long lo na oda.

- Long luksave gut long ol lo na oda ejensis na wokbung wantaim ol.

- Kisim klia tingting long raitim ol rait infomesen o toktok we ol pablik na komyniti i ken lukim, ritim na harim na save gut long ol ripot bilong lo na oda, na

- Long promotim gut wok bilong Lo na Jastis sekta long kantri na ol arapela bikpela samting we i kam long lain wantaim lo na oda.

Presiden bilong PNG Midia Kaunsel, Peter Aitsi, husat i bin kamap long opening bilong dispela woksop i tok amamas na tenkim Lo na Jastis Sekta Apros na PNG Media Council long bungim tingting na kamapim dispela woksop. Na em i bin hamamas tru long lukim ol lain bilong ol media ogenesisen husat i bin kamap long dispela wan wik woksop. Ol lain husat i go pas long dispela ripoting lo na oda woksop em Joe Kanekane, Bonner Tito, Cletus Ngafkin, Anna Solomon na Frank Senge Kolma.

NEC lukluk long otonomi bilong ENB

Veronica Hatutasi i raitim

NESENEL Eksekutiv Kaunsel i bin bung long tupela de long Vunapope insait long Is Nu Briten las wik.

Dispela Kabinet bung we i gat 27 memba long en i bin sindaun nau long Vunapope konferens senta long toktok long sampela ol bikpela samting i sut long go hetim kantri aninit long wok bilong salim ol samting i go aut na kamapim mani (ekspot driven ikonomi).

I gat ripot olsem Difens Minista i gat sabmisen o ripot pepa em i redim long putimaut long dispela bung.

Wankain tu long Minista bilong Hausing, Maining na ol arapela moa.

Hap Hap Nius

Katedan risos senta helpim planti lain

WANPELA nupela risos senta long Nu Ailan provins i wok long helpim gut olgeta lain long karimaut ol wok bilong ol. Risos senta i stap long ples Katedan long sentrel Nu Ailan. Elementeri skul seksen bilong Edukesen Divisen i bin opim dispela risos senta.

Em i kamap olsem namba wan risos senta we planti grup i karamapim ol skul, ol sios, komyuniti, ol gavman na praiwet grup i ken yusim long ol wok o bung bilong ol. Ol turis bilong ovasis i wok long yusim dispela senta long slip long en o long kaikai long en. Ol skul i plen long yusim senta long ol trening kos na Kimadan Yunaitet Sios seket i yusim senta long holim bung bilong em.

Wesley Siangat husat i bin pelnim dispela risos senta i askim strong ol gavman ejensi na ol arapela grup long yuisim senta long go hetim wok bilong ol we bai kamapim gutpela samting long helpim ol pipel long provins.

Nu Ailan wetim tok orait long go antap bilong PMV pe

PE bilong ol PMV bas na trak long Nu Ailan bai go antap sapos Len Trensport Bot i tok orait long apim ol bas na PMV fea. Nu Ailan Interim PMV Operetas Asosiesen i bin mekim dispela disisen na i go pinis long Provinsel Eksekutiv Kaunsil long tok oraitim dispela tingting. Sapos NLTB i tok oraitim dispela tingting, ol bai givim i go long Provinsel Len Trensport Bot long etvataisim na go hetim.go antap long PMV pei.

Singautim helpim bilong ol Tanga Katolik

SANTU Boniface Peris long Amfar, Tanga Ailan insait long Nu Ailan provins, i laik stretim olpela haus lotu bilong em na skruim pastorel kea wok bilong em.

Olsem na em i askim long ol sios memba bilong em long gviim mani helpim. Peris Kaunsil na Pater Justin Aminio i askim olgeta pipel bilong Tanga Ailan husat in stap long ailan, provins na kantri long givim helpim bilong wanem dispela bai kamapim gutpela samting long spiritual sait bilong ol manmeri na pikinini.

Pater Aminio i tok em i bilip olsem planti lain Tanga bai harim askim long helpim singaut na givim sapos wantaim mani long helpim lokel sios bilong ol.

Em i tok ol Tanga Katolik husat i laik helpim i ken putim mani long beng akaun bilong Kavieng Diocese Charity akaun namba 10000813696 long han bilong Saut Pasifik Beng long Kavieng.

Ol pipel bilong Nu Ailan singaut long gutpela sevis

Veronica Hatutasi i raitim

BIKPELA krai long planti manmeri long Nu Ailan provins em long gat gutpela rot na trenspot na ol sevis bilong helt na edukesen.

Ol i askim provinsel gavman we Gavana Ian Ling Stuckey i go pas long en long lukim na harim wari bilong ol na mekim samting bilong helpim kisim ol sevis na kamapim gut provins bilong ol.

Planti i wari tru long rot na trenspot long bikples tasol moayet, long ol liklik ailan.

"Nu Ailan i gat planti ol liklik ailan na bikpela wari em long provinsel gavman i baim ol liklik bot bilong wokim ol raun namel long ol na Kavieng.

"Provinsel gavman i mas tingting long bihain taim bilong provins. Rot, trenspot, helt na edukesen sevis em ol bikpela samting pipel i laikim bai gavman i lukluk long en na sapotim gut. Sekenderi skul long provins i save gat hevi long i nogat gutpela wara na pawa saplai. Na taim ol dispela i bagarap, ol sumatin na tisa i save kisim taim.

"Planti hap bilong rot ol i mas stretim na mekim gut moa na wok long en. Na ol liklik ailan i laikim ol liklik trola o bot long wokim raun na karim ol manmeri, ol kago na ol samting ol pipel i kamapim olsem kopra, kakau na ol gaden kaikai i go long ol maket. Planti birua i save kamap taim ol pipel i yusim ol motobot na solwara i

solap, i gat bikpela ren na win.

"Narapela samting tu em provinsel gavman i mas karimaut ol mentenens long ol rot na maski long givim tasol ol bikpela trak (Seaboard trak) i go long sampela lain. I moabeta long stretim ol rot pastaim bilong wanem dispela bai helpim olgeta pipel long kisim gut ol sevis i go long ol ples na tu, long kisim ol kakau, kopra na ol arapela samting i go long maket," wanpela mausman bilong ol manmeri husat i wok long pilim dispela hevi i tok.

Ol ripot i tok Nu Ailan Provinsel gavman i save kisim klostu long K1milien olsem royelti mani i kam long gol main na i moabeta long yusim dispela mani gut long ol rot we bai helpim olgeta pipel long en.

Bogenvil kisim ol nupela polis manmeri

NAMBA wan grup bilong ol polis bilong Australia husat i bin kam kamap long Pot Mosbi long las Sande Ogas 29 aninit long Enhansmen Koporesen Pekej namel long Australai na Papua Niugini bai go wok long Bogenvil.

18-pela polis manmeri i bin kam kamap long Pot Mosbi long Australia.

Ol gavman bilong PNG na Australia i bin paitim ol tok long dispela program long las yia yet, na i gat bikpela mani we i winim sampela milien kina long en long kamapim dispela program.

9-pela long ol polis manmeri bilong Australia bai go stret long Bogenvil bihain wanpela wik trening long Bomana we ol i sindaun insait long trening bilong kisim na skruim save long PNG na pipel bilong en. Dispela bai givim ol sampela save long tok-

ples, kalsa, na rot we PNG polis i wok long en na ol lo em i bihainim.


Bihain long wanpela wik trening long Bomana Polis Kolis, 9-pela bai lusim Mosbi long neks wik Septemba 7 na go long Bogenvil.

Narapela 9-pela bai go bek long Australia na kam bek gen sampela taim klostu long pinis bilong dispela mun long joinim ol arapela wanwok bilong ol gen long Bogenvil.

Ol dispela polis manmeri bai wok long ol ples olsem Buka, Arawa na Buin.

Long wankain taim tu, namba tu grup bilong ol yangpela man na meri husat bai skul long kamap ol polisman meri long Bomana Polis Kolis i bin kamap long las Fonde na Sarere.

Namba wan grup i bin pinisim 6-pela mun kos long pinis bilong mun Jun na ol i bin go bek long ailan long las mun.



Sans!...Tupela meri 'Bilas Ples' i gat laik long baim wanpela long ol dispela kanu long Kavieng maket. Prais bilong ol en i liklik olsem namel long K20 na K70. Foto: VERONICA HATUTASI

BIABIA GO LONG PAINAPOL BILDING NA OL SEKIURITI PASIM EM LONG DUA"



TARANGU SEKIURITI INO BILIP LIKLIK LONG EM"



TASOL BIABIA I LES LONG SAINIM BUK NA GIAMANIM SEKIURITI YA..."



TASOL BIABIA INO HARIM GUT NA EM BEKIM..."



Kulangit Elementeri Skul kisim K2000 long Aini

Tony Sapan i raitim

OL papamama husat i bin stap insait long wanpela bung long Kulangit Elementeri Skul klostu long Kavieng taun i bin harim save olsem memba bilong palamen bilong Kavieng, Martin Aini, i givim namba wan tingting na luksave long edukesen.

Ol i bin harim olsem Mista Aini i bilip olsem givim gutpela skul taim ol pikinini i liklik yet bai givim ol gutpela save na tingting long mekim ol samting taim ol i wok long kamap bikpela.

Ol papamama i bin harim tu olsem sapos ol skul long olgeta level i laik kamapim gutpela samting, ol i mas gat ol samting we ol sumatin i ken sindaun gut na skul gut. Na ol papamama na sumatin i mas lukautim gut ol samting.

Eksekutiv opisa bilong memba bilong Kavieng, Paul Vatlom, i bin wokim dispela toktok taim em i givim K2,248.50 sekmani i go long siaman

bilong skul, Nelson Lagaia.

Skul bai yusim dispela mani long haiarim senso long katim timba bilong pinisim wok long ol skul bilding.

Dispela em hap mani bilong K3,000 ol bin tok oraitim skul long en bihainim wanpela askim ol bin putim long kisim mani helpim long mekim dispela wok yet.

Taim Mista Lagaia i autim tok tenkyu bilong em long dispela helpim, em i bin tok olsem ol bai yusim gut mani we bai helpim tu ol lain pikinini na bubu i kam long bihain taim.

Em i bin askim strong ol papamama na ol arapela manmeri long lukautim gut ol samting bilong wanem em bai helpim ol pikinini bilong ol.

Rekot i soim olsem i kam inap nau, Mista Aini i givim pinis K100,000 helpim mani na ol arapela samting long ol elementeri skul long Kavieng Open Iektoret.

Stokbroka kampani holim awenes long baim sea

Michael Novingu i raitim

MOA long wan handred (100) manmeri i bin kamap long awenes o kempen bilong Capital Stok Brokas Ltd kampani bilong Pot Mosbi long luksave long wanem kain wok o sea ol inap long baim long ol kampani insait long PNG na ovasis. Dispela awenes o kempen ol i holim long Madang Resort Hotel.

Capital Stock Brokers Ltd i gat mak olsem 13 kampani ol i putim long lista aninit long stok eksens bilong ol. Sevenpela kampani em ol maining kampani na 6-pela em ol arapela kampani.

Edministresen Menesa bilong Capital Stock Brokers Ltd Paul Niaga i tokim *Wantok Niuspepa* long Madang olsem astingting bilong mipela long kam long Madang em long tokim ol pipel long baim ol sea we mipela i putim long

eksens maket. Planti manmeri bilong dispela kantri i no luksave long wok bilong baim sea na salim gen. Long dispela rot em i gutpela we long investim o putim sampela mani bilong yu hait i stap bai wokim win mani bilong yu bihain taim yu laikim long wanem kain wok yu laik kirapim.

Mipela bai helpim yu long investim mani bilong yu long wanem gutpela kampani mipela i ting bai wokim gutpela win mani bilong yu. Olsem na em i gutpela sait bilong yu long investim mani nau. Na long sait nogut bilong em, kampani yu baim sea i no mekim profit em bai yu i no inap kisim win mani. Yu i ken salim sea bilong yu na baim nupela sea long arapela kampani, Mista Niaga i tok.

I gat wankain awenes o kempen long ol arapela senta olsem Lae, Wewak na Mt Hagen i wok long i go het long dispela wik yet.

Makam Veli hai skul bai holim kalsa so

Yowakicte Buafec i raitim

WANPELA bikpela gavman skul em Makam Veli Hai Skul insait long Morobe provins ausait long Lae siti bai kamapim kalsa so bilong ol long Septemba 10 na 11.

Dispela so bai kamapim plan-ti samting olsem string ben resis, tumbuna singsing grup na laip ben musik bilong Tumbuna Treks bai pilai. Ol biknem musik lain olsem Demas Saul na Wali Hits na tu planti kol dring na kaikai ol bai salim long dispela taim insait long so graun.

Planti ol papamama bilong ol pikinini skul long hap wantaim ol pren bilong ol na arapela ol manmeri bai kamap long lukim dispela so bilong skul long Kaiapit distrik.

Ol tisa na skul sumatin i tok welkam long kalsa so bilong mipela Markham Veli Hai Skul na kaikai sampela strong banana karapua na malafiri wantaim mipela long mekim dispela so i kamap gutpela na naispela long olgeta manmeri long lukim na stap insait wantaim.

Wareo rais fama i kisim rais masin

Yowakicte Buafec i raitim

INSAIT long Finsafen Distrik long Wareo, rais i kamap gut tasol i nogat miling masin bilong kamapim kaikai we tupela bikpela fama Gerisi Bosing na Naporiong husat i helpim ol komyuniti nau long Wareo bikples long milim rais bilong ol long kaikai na salim long kisim mani.

Mista Bosing i tokim *Wantok Niuspepa* olsem "dispela ol rais nau mipela i planim em bipo sid bilong 1960s mipela i wok long planim inap long 80s na i go daun mipela i bin stop long planim gen dispela rais ya."

Em i tok "tasol nau mipela i lukim olsem maket bilong rais i

go antap moa na i gutpela olsem na mipela i planim ol rais bilong mipela. Dispela taim i kam long yia 2000 insait long ol liklik wanwan asples bilong mipela yet nau yia 2004 i nogat masin, mipela i sutim long tongtong.

Mista Gerisi i tok "nau yet i kam em mitupela yet i gat hap hap mani mitupela i bungim mak olsem K5,000.00. Mitupela i karim i kam long Lae Provinsol (DAL) het opis long kisim sampela moa sapat antap long en. Siaman bilong DAL long Lae na Kaunsol presiden bilong Kotte LLG Mictine Kemung wantaim opis bilong em (DAL) i helpim mitupela long baim tupela maikor mini miling masin long Lae Brian Bell kampani we nau

bai helpim komyuniti insait long Wareo ples.

Mista Bosing i tok, mitupela i tok tenkyu long ol opisa bilong DAL Wawing na rais fama opisa long Lae Provinsol het opis wantaim presiden bilong mipela Kotte LLG long Finsafen na Siaman DAL long gutpela wok bung na sapat bilong bungim gutpela aida na tingting bilong ol. Ol i bin sekim dispela rais masin long karim i go aut long ples long helpim mipela ol rais famas na komyuniti insait long Wareo.

Ripot i tok i luk olsem Mista Kemung bai opim dispela ol rais masin bihain long ol komyuniti i ken statim wok long milim rais beg bilong ol na salim.

Madang komyuniti helt wokas kros long 1989 awods

Michael Novingu i raitim

MOA long tu handred komyuniti helt wokas bilong Madang provins i no kisim 1989 awod bilong ol we Nesenel Helt Dipatmen i bin givim ol long en. Ol dispela awod em yunifom, rentel na sift alawens.

Ol sampela komyuniti helt woka i bin kamap pablik seven ol i peim ol pinis na ol dispela lain i no kamap pablik seven na i stap olsem kesual ol i no peim ol yet.

Bosman bilong Helt Sevises long Madang provins Marcus Kachau i tokim *Wantok Niuspepa* long Madang olsem Nesenel Helt Dipatmen i redim mani mak olsem K10 milien. Faiv milien kina bai mipela i peim long dispela yia na narapela K5 milien bai mipela i peim long yia i kam bihain 2005.


Nesenel Helt Dipatmen i makim de bilong peim aut long dispela mani em long de 26 i go inap long de 28 bilong mun Julai, tasol

mipela i no mekim peaut long wanem i gat asua i bin kamap long Nesenel Helt Opis bilong Helt Dipatmen long Pot Mosbi. Tasol bihain mipela i wokim namba wan peimen long de 11 i go inap long de 13 bilong mun Ogas, 2004.

Ol dispela lain mipela i no peim ol yet bihain taim mani i kam bai mi salim toksave na ol bai i kam long helt opis long Madang na kisim, Mista Kachau i tok.

Long wankain taim, president bilong komyuniti helt wokas asosiesen Mark Kadud i no wanbel wantaim Helt Dipatmen long bilong wanem na ol i no mekim pe aut hariap.

Em i tok ol sampela membas bilong em i kam long rurel eria olsem Raikos, Midel Ramu, Simbai, Aiom na ol arapela hap na istap long Madang tripela wik nau. Husat bai givim marasin long ol sik manmeri long ol ples bilong ol em i askim. Na tu i stap long taun em i hat long i stap long sait bilong kaikai na mani.



Laki manki! Helikopta bilong Sir Peter Barter i bin kamap long taim stret long helpim wanpela yangpela manki bilong Long Ailan long Madang husat i pundaun na brukim lek bilong em long las wik. Helikopta i karim em i go long Madang haus sik we em i kisim marasin i stap. Foto: SIR PETER BARTER

Cat® 'C' Series Hydraulic Excavators

305C, 307C,
308C, 311C,
312C, 314C,
315C, 318C,
320C, 322C,
325C, 330C



Caterpillar® 'C' Series Hydraulic Excavators incorporates innovations for improved performance and versatility.

- **Engines and Hydraulics** - Cat® engines combine with proven hydraulics to give consistently high power and control in the field.
- **Structures** - Rugged Caterpillar® undercarriage design and proven structural manufacturing techniques assure outstanding durability in the toughest applications.
- **Operator Stations** - Operator work stations are quiet with ergonomic control placement and convenient adjustments, low lever and pedal effort, ergonomic seat design and highly efficient ventilation.
- **Serviceability** - Longer service intervals and easier maintenance results in better machine availability and lower owning and operating costs.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAUL
Phone: 982 1244
Fax: 982 1129

Yawari opim rot projek long provins

Joe Ivaharia i raitim

SAUTEN Hailans Gavana Hami Yawari i bin mekim wanpela wok painimaut i go long ilektoret bilong long dispela wik. Long dispela wokabaut em i bin go long kamapim wanpela nupela rot we bai i kampa long Lai veli eria.

Dispela nupela rot bai i ron long ples Sumie go long ples Kip na i go moa yet long Sumbie viles.

Long Sumbie viles bai i ron i go bungim Nipa na i kam long Mendi.

Moa long 3,600 man-meri na pikinini i bin kamap long ples Sumbie long witnessim wanpela seremoni long brukim graun bilong statim wok long dispela rot.

Gavana Yawari wantaim menesing darekta bilong Wellsos Enjiniaring kampani Koh Chang i bin go pas long brukim graun long dispela nupela rot.

Wellsos Enjiniaring kampani i bin winim kontrak long kamapim dispela rot we mani mak bilong projek i stap klostu long K7 milien.

Gavana Yawari i bin givim wanpela mani mak olsem K250,000 i go long dispela kampani long statim wok.

Mista Yawari i bin givim dispela sek mani i go long han bilong Mista Koh.

Mista Koh i tok wok bilong dispela rot projek bai kamap long tupela wik bihain we ol bai kisim ol wok masin wantaim wokman i kam long Maunt Hagen i kam long Mendi.

Bihain long Sumbie ples Gavana i bin go daun long ples Kip long mekim wokabaut bilong em na toktok wantaim ol pipel. Long ples Kip em i mekim wankain pasin long givim wanpela sek mani mak olsem K250,000 i go long kontrakta kampani. Dispela rot bai kamapim wanpela join long dispela ples we bai i kamapim planti ol

gutpela wok developmen insait long Lai veli long helpim sindaun na laipstail bilong pipel.


Mista Yawari wantaim Mista Koh i askim ol pipel long noken bagarapim ol wokman na masin bilong kampani. Ol i mas sapotim ol long ol i go het na wokim gut ol dispela rot projek.

Gavana Yawari i bin tok tu olsem long stretim dispela rot em i mas stretim tu ol bris long hap we dispela rot bai i ron long en.

Planti komyuniti lida i bin mekim tok amamas i go long Gavana na provinsal gavman bilong em long stretim dispela wanpela hevi bilong ol.

Planti long ol i save painim hat tru long karim ol kaikai na kopi bilong ol i go long Mendi we taim ol i wokabaut i save kisim olsem wanpela de olgeta long wokabaut. Na wantaim dispela rot bai i ken mekim laip i isi liklik long helpim mipela, ol lida i tok.

Nesing koles i no amamas long ol lida



Florida Kume i kisim pepa bilong em bihain long em i winim skul. Foto Sape Metta

Sape Metta i raitim

LONG pinis bilong mun Julai, 30 nesing sumatin long Hailans Rijinol Koles ov Nesing (HRCN) i bin greduet na kam aut wantaim ol setifiket bilong wok olsem ol nes long lukautim ol sik manmeri na pikinini long ol haus sik na klinik insait long kantri.

Bikpela amamas

pasin i bin kamap taim ol sumatin i kisim setifiket, long wanem em i kaikai bilong hatwok bilong ol long stadi na kisim trening long kamap wokman na meri long o haus sik, klinik, etpos na ol helt senta.

Tasol long bosmeri husat i save go pas long dispela koles HRCN olsem prinsipel, em i gat bikpela bel hevi na wari tru we em i bin autim long taim bilong dispela namba 17 greduesen de we i bin kamap long Goroka, lsten Hailans provins.

Prinsipel Molly Marava i tok koles ya i save kisim na trenim ol sumatin husat i save kam long olgeta Hailans provins, na tu ol arapela provins olsem Madang, Manus, Milen Be, Nu Ailan, Is

na Wes Nu Briten provins.

Em i tok HRCN i save trenim gut ol dispela sumatin, tasol long taim bilong graduesen i nogat wanpela lokel, provinsal na nesanel lida na tu ol bosman long level bilong nesanel helt dipatmen i save kamap long lukim o witnessim ol greduesen.

"Mi i gat bikpela bel hevi na wari, bilong wanem i luk olsem ol lida ya i nogat wanpela tingting long HRCN na ol sumatin bilong en," Misis Marava i tok.

Em i tok, HRCN em i no wanpela liklik koles tasol ol lida i save lukim olsem em i samting nating.

"Long greduesen bilong ol arapela

bikpela skul ol lida i save kapsait wan tu tasol taim ol i save kisim singaut. Na olsem wanem long HRCN?" Misis Marava i askim. Em i tok bipo long ol greduesen we i kam na i go, HRCN i save salim askim na toksave i go long ol lida long kamap na lukim greduesen, tasol i nogat wanpela long ol lida ya i save kamap. Inap nau i save kamap.

Dispela 17 greduesen bai kamap long Yunivesiti ov Goroka (UOG). Na em bai namba wan taim long ol sumatin bilong HRCN i greduet long UOG long neks yia. Em i bikos HRCN i sainim pinis wanbel long dispela yia long wok aninit long lukaut bilong UOG.

Wara i drai long Hailans provins

I GAT pret olsem bikpela drai bai givim hevi long laip na sindaun bilong ol manmeri insait long ol Hailans provins.

Dispela hevi i kamap klia taim ripot i kam long Sauten Hailans provins olsem planti wokmanmeri bilong gavman i lusim wok na go nabaut long ol ples we i gat wara bikos wara i drai pinis. Na

planti i wok long kisim wara long Wara Mangani we i helt atoriti i tok wara ya i no klin tasol ol manmeri i mekim nating long en.

Dispela hevi i kamap bihain long opis bilong Weda Sevis i bin tokaut olsem bai i gat drai taim olsem long 1997 insait long kantri.

ANZ Goroka pulim mani long helpim kensa program

SIK kensa i wok long kamap bikpela tru na i wok long kisim laip bilong planti manmeri long kantri bilong yumi PNG. Na long daunim o stapim dispela sik, yumi i nogat ol strongpela marasin na ol pawa masin (radio-therapy) long yusim long stopim sik kensa.

Lukluk long dispela hevi, ol wok manmeri husat i save wok wantaim ANZ Beng long Goroka i kamapim fan resing long helpim PNG Cancer Society long painim sampela gutpela rot long daunim sik kensa.

Asisten beng menesa Mana Abori i tok sik

kensa em i wanpela bikpela sik we i wok long kamap bikpela tru insait long ol wanwan komyuniti bilong yumi. Na planti manmeri bai lusim laip bilong ol sapos yumi i no inap painim sampela rot long daunim na stopim dispela sik.

Long dispela as ol wokmanmeri long ANZ Beng long Goroka i kamap wantaim dispela tingting long kamapim fan resing we ol i ken helpim na sapotim PNG Cancer Society long painim sampela gutpela rot bilong daunim dispela sik.

Mista Abori i tok amamas long ol kampani

long Goroka husat i givim ol donesen na sapotim dispela fan resing wok.

Ol kampani husat i givim ol helpim em Coffee Industry Corporation (CIC) wanpela kopi masin, Mendikwae Holdings; ol wul blanket, John Kuria long Kongo Kofi; ol kopi paket, ol wok manmeri long ANZ beng Goroka, Kofi meka pekluta na Kim Printing ol raifel tiket. Mista Abori i tok ol tiket bilong winim ol prais samting em ol bai droim long Trinde, Septemba 15. Na olgeta mani i kamap long tiket sels bai i go long PNG Cancer Society.



PNG WATERBOARD

PUBLIC TENDER No. TCWB 46/2004

WATER SUPPLY EXTENSION TO RD-TUNA CANNERS Limited IN MADANG

The PNG Waterboard invites suitably qualified civil works contractors who are registered in PNG to submit tenders for the supply, delivery, installation, testing and commissioning of a 200mm diameter water supply pipeline from the Madang Teachers College, to the RD-Tuna Cannery Limited in Madang, Madang Province. Tender Documents and Construction Drawings can be obtained from the Madang Waterboard Office for a non-refundable fee of K150.00. Interested Tenderers operating out of Madang should contact the PNG Waterboard's Technical Services Division on phone: 325 6866 or fax: 325 6836.

Attention: Principal Engineer Technical Services for further information.

All Tender applications MUST be sent to:

PNG Waterboard Tender Box
First Floor, Garden City Building
PO Box 2779
BOROKO, NCD 111

The Tender MUST BE CLEARLY MARKED as
Tender No. TCWB 46/2004

Tender closes on Friday 1st October 2004 at 10.00 am

Hap Hap Nius

Pait bruk namel long tupela ples

TUPELA man i kisim bagarap na planti handred i nogat haus bihain long wanpela pait i bruk namel long tupela ples long Saut Fly distrik bilong Westen provins.

Polis Komanda bilong Sauten Rijon, Supaintenden John Marru, i tok olsem pait i bin bruk namel long ples Old Mawata na Masingara bihain long sampela manki Mawata i bin brukim wanpela kanu bilong ol Masingara.

Sampela lida bilong Masingara i bin i go long Mawata long stretim dispela hevi, tasol bihain long dispela de ol Masingara i bin paitim wanpela manki Mawata taim em i bin i go long ples bilong ol.

Polisman stilim masin bilong pilai laki

WANPELA polisman long Pot Mosbi na foapela man husat i bin helpim em stilim tupela masin bilong pilai laki, mani mak bilong ol i sanap long K10,000 long wanwan, na K582 long mani, i bin-sanap long kot.

Ripot i tok dispela polisman i bin yusim polis yunifom na yusim wanpela kar bilong wanpela sios long Pot Mosbi long reidim tupela hap, wanpela long Hanuabada na wanpela long Hohola, we stilim ol wanwan masin long ol laki haus long ol dispela hap.

Nem bilong dispela polisman em Albert Inee na em na ol narapela foapela man husat i bin helpim em kamapim dispela stil pasin i bin sanap long kot las Fraide.

Tingim Kokoda Trek

...Hai Komisn bilong Australia kamapim poto so

Joe Ivaharia i raitim

HAI KOMISIN bilong Australia long Papua Niugini i kamapim pinis wanpela poto so bilong tingim Kokoda Trek.

Australia na PNG i gat strongpela histori bilong Kokoda Trek we planti ol soldia na man husat i save helpim ol soldia long karim kago o ol soldia yet taim ol i kisim bagarap, i bin lusim laip bilong ol long taim bilong Wol Woa 2.

Long taim bilong opim Kokoda poto so, Hai Komisina bilong Australia long PNG, Michael Potts, i bin tok olsem dispela eksibisen i makim namba 62 anivesari bilong "Pait long Isurava", we dispela pait i bin stap foapela de, moa long 1,000 man Australia na 50 man PNG i bin pait egensim 6,000 soldia bilong Japan.

Ol Japan i bin holim pasim pinis Kokoda Ples na i wok long kam long Isurava we dispela bikpela pait i bin kamap.

Long taim nau Isurava em i wanpela gutpela ples we i nogat kankain hevi na i hap bilong malolo we, long tingim dispela pait, Gavman bilong Australia i sanapim wanpela

ston kaving ol i kolim memoriel, long tingim ol man husat i bin pait na dai long dispela hap.

Mista Potts i tok sampela bilong dispela ol poto em ol wok manmeri bilong em long Hai Komisn i bin kisim taim ol i bin wokabaut long Kokoda Trek.

Moa long foapela grup bilong ol woklain bilong Komisn i bin mekim dipela wokabaut las mun. Sampela bilong ol i bin wokabaut wantaim famili bilong ol tu.

Mista Potts i tok amamas long ol wok manmeri long kamapim dispela tingting long wokabaut bihainim dispela rot long tingim ol poroman na long wankain taim ol i mas go lukluk raun long ol arapela hap bilong kantri tu.

Mi laik askim olgeta manmeri bilong Australia i stap long PNG long mekim wok helpim i go moa long ol lokel pipel long sait bilong helt, edukesen, komyuniti sevis na long spots tu, Mista Potts i tok.

Dispela poto eksibisen bai i op inap long tupela wik olgeta insait long hap bilong Australia Hai Komisn.



Mista Potts i lukluk long ol poto. Poto: JOE IVAHARIA

Ol manki asples i amamas long mekim turis wok

Joe Ivaharia i raitim

WANPELA nupela turis kampani i wok long helpim ol manki asples long Kokoda Ples long we bilong kamap turis gaid o man bilong soim we long ol wokabaut bilong ol turis na long lukautim ol tu.

Kampani em Eco-Tourism Melanesia na i stap long Pot Mosbi.

Tasol wanpela gutpela samting bilong dispela kampani em ol wokman bilong em ol i ples manki bilong Kokoda Ples.

Kampani i bin kisim 7-pela manki na i wok long lainim ol we bilong kamap gaid na pota o man bilong helpim karim ol kago bilong ol turis.

Menesa bilong kampani, Aaron Hayes, i bin tokim Wantok Niuspepa olsem em i amamas tru long kisim na lainim ol manki long wanem dispela rot o trek i stap long hap bilong ol.

Em i tok kampani bilong ol i stap klostu wanpela yia nau na long bisnis sait ol i wok



Eco-Tourism Melanesia. Poto: JOE IVAHARIA

long kisim ol turis long liklik hap grup olsem ol grup wantaim 10-pela turis.

Mista Hayes i tok long bihain taim ol i wok long tingting long kamapim sampela tingting

long tokim ol manmeri turis o ol lain i wok-abaut long traim na slip long ol ples klostu long ol hap long Kokoda Trek.

Long dispela kain pasin ol turis i ken lainim gut laipstail bilong ol lokel pipel.

Mista Hayes i tok tu olsem i nogat wanpela stoa i stap long ol ples namel long Sogeri i go long Kokoda long hap rot bilong trek, na tingting bilong ol em long helpim ol ples lain long kamapim kain ol liklik bisnis olsem treid stoa.

Taim ol turis i kam na slip long ol ples ol bai karim mani i kam insait we ol i ken baim ol lokel kaikai na sapos i gat wanpela stoa long hap orait ol turis i ken baim ol samting tu long en.

Philip Arari, mausman bilong ol Kokoda yut i tokim Wantok Niuspepa olsem ol tu i amamas tru long wok kamap turis gaid na pota.

Em i tok ol i save bungim na mekim pren wantaim planti ol turis husat i save kam wok-abaut long Kokoda trek.

Sampela bilong ol turis husat i kamap pren wantaim mipela i save go bek long hap kantri bilong ol na salim ol presen i kam long mipela, Arari i tok tu.

Ruben Keke, wanpela manki, i tok ol save karim ol turis na ol wokabaut lain i go i kam namel long Mosbi na Kokoda na dispela em i olsem wok pe bilong ol.

Narapela manki, Ralph Pehara, i tok long las wik ol i bin kamap long Pot Mosbi bihain long ol i kisim 9-pela turis i go long Kokoda.

Taim ol i kamap long Mosbi ol i bin mekim wanpela wok long klinim ston mak bilong "Fuzzy Wuzzy" enjel i stap long Jack Pidik Pak.

Trophymas Orimba, narapela manki, i tok tu olsem ol i laik lukim planti moa pipel bilong yumi i mas traim na wokabaut long luksave long Kokoda Trek na long wankain taim save long histori bilong yumi.

Mista Hayes i tok tu olsem ol i lukluk long kisim sampela moa turis raun i go long Kokoda long neks mun.

TOYOTA Advantage
USED VEHICLE RANGE

✓ WARRANTY
✓ FINANCE
✓ PARTS & SERVICE
✓ 60 POINT SAFETY CHECK
✓ ALL VEHICLES SERVICED
✓ 15 BRANCHES NATIONWIDE
✓ PRICE

Ela Motors
USED VEHICLES

TOYOTA TSUSHO (PNG) LTD.

Quality Endorsed Company
As a member of the Toyota Group

WEEKLY SUPER SPECIALS

Drive Away FROM **K59,990**
Toyota Prado 4x4 S/Wagon. Only 1 left

Drive Away FROM **K25,990**
Toyota Camry sedans. Executive Class

Drive Away FROM **K48,990**
Toyota Hiace Buses. 3L Diesel, Aircon.

TOYOTA CAMRY STATION WAGON
Excellent Family wagon, Fully kitted, AM/FM Radio, Aircon, plus other features.
Drive Away! FROM **K39,990**

3 TO CHOOSE FROM...HURRY!

PLUS, MANY MORE PASSENGER & COMMERCIALS TO CHOOSE FROM...HURRY

PLUS, OTHER PRICES FROM **K3,995**

Call in and see our friendly Used Vehicle Sales Team Today!

PORT MORESBY PH : 3229483 / 3229412 • LAE : 4781800 / 4781809 • MT HAGEN : 5421888 • GOROKA : 7321844 • KOKOPO : 9829100

Hurry Offer Expires : 09 - 09 - 2004.

Japan bai no inap baim kompensesen

Desney Koimo i raitim

MINISTA bilong Difens na Memba bilong Sumkar, Mathew Gubag, i givim wanpela tok lukaut i go long ol pipel bilong em long noken putim mani i go long PNG Redress Asosiesen.

Em i mekim dispela tok bihain long wanpela ripot we i askim Gavman bilong Japan long baim kompensesen long ol bagarap ol ami bilong Japan i bin mekim long ol pipel bilong Papua Niugini.

Mista Gubag i tok olsem

...lgam mas i noken giamanim ol pipel - Gubag

Embesi bilong Japan i bin mekim klia long wanem hap gavman bilong Japan i sanap, we PNG tu i bin sainim wanpela triti o poroman pepa bihain long woa wantaim Australia na Japan.

Gavman bilong Australia long dispela taim i kilim i dai dispela rait bilong PNG long askim kompensesen long Japan long ol bagarap lain bilong woa.

Em i tok tu olsem long dispela las 5-pela yia, PNG

Redress Asosiesen i bin kisim mani long ol pipel bilong Madang, tasol i no bin givim bek wanpela gutpela bekim long ol lain husat i bin givim mani pinis.

Mista Gubag i askim dispela asosiesen long bekim bek mani bilong ol lain husat ol bin putim mani pinis i go long dispela asosiesen.

Em i tokim Nesenel Siaman, Thomas lgam, long noken giamanim ol pipel.

Long wanpela bung bilong palamen em i bin askim Praim Minista long dispela kompensesen mani na Sir Michael Somare i tok aut olsem bikos-long dispela triti PNG i bin sainim wantaim Australia na Japan, bai i nogat kompensesen i kam long Japan.

Mista Gubag i askim ol pipel bilong Sumkar long noken bihainim ol giaman toktok na i mas save olsem ol bai i no inap kisim mani we PNG Redress i tok promis long en.

SELEBRETIM INDEPENDENS LONG COURTS WANTAIM OL DISPELA NAMBAWAN DIL! BAIM NAU SEVIM NAU!



SEIVIM K1,054

KISIM FREE

DIPOSIT K1.00

Mabe

EM1353BFO 5 BENA KES STOV #322727

K795

K1,849

K36

- 5-pela bena, wok na hap bilong kukim pis
 - isi long klinim enamel kris banis • is tanim handol
 - klas dua bilong aven
- DINAU PRAIS K925**



SEIVIM K1,100

KISIM FREE

DIPOSIT K1.00

Fisher & Paykel

FISHER & PAYKEL 510 Lita Ches Freeza H510SL #315728 Hevi mak: 510 Lita

K2,199

K3,299

K90

Fisher & Paykel FISHER & PAYKEL 510 Lita Ches Freeza H510SL #315728 Hevi mak: 510 Lita

- rot bilong ais wara - isi stret long klinim na rausim ais wara igo.
- Antapim-antapim basket - inapim stret wara bilong putim ol kaikai gut. Handol bilong freeza i save igo bek na hait insait long givim moa speis long kago.
- Lok

DINAU PRAIS K2,529



SEIVIM K596

KISIM FREE

DIPOSIT K1.00

Fisher & Paykel

FISHER & PAYKEL 164 Lita Liklik Ches Freeza H160SL #315726 Hevi mak: 164 Lita

K1,299

K1,895

K55

Fisher & Paykel FISHER & PAYKEL 164 Lita Liklik Ches Freeza H160SL #315726 Hevi mak: 164 Lita

- rot bilong ais wara - isi stret long klinim na rausim ais wara igo.
- Antapim-antapim basket - inapim stret wara bilong putim ol kaikai gut. Handol bilong freeza i save igo bek na hait insait long givim moa speis long kago.
- Lok

DINAU PRAIS K1,499



SEIVIM K150

DIPOSIT K1.00

KISIM FREE

AKITA

3 Kilogram Tupela Tab Wasin Masin DW5014 #302714 Hevi mak: 3 Kilogram

K699

K849

K4

AKITA 3 Kilogram Tupela Tab Wasin Masin DW5014 #302714 Hevi mak: 3 Kilogram

- ples bilong rausim pipia wara • spin-drain

DINAU PRAIS K819



SEIVIM K100

KISIM FREE

DIPOSIT K1.00

LG

340 Lita 2-pela dua Fris/Freeza GR-T342GL #311849 Hevi mak: 340 Lita

K1,799

K1,899

K74

340 Lita 2-pela dua Fris/Freeza GR-T342GL #311849 Hevi mak: 340 Lita

- CFC/No Frost/Bio Shield • 2 Door Cooling™ • Door Cooling
- Magic Crisper™ • EasyGet Tray™ (Twist Ice Tray)

DINAU PRAIS K2,069



SEIVIM K1,004

KISIM FREE

DIPOSIT K1.00

LG

580 Lita 2-pela dua Fris/Freeza GR-T582GL #311861 Hevi mak: 580 Lita

K2,995

K3,999

K119

580 Lita 2-pela dua Fris/Freeza GR-T582GL #311861 Hevi mak: 580 Lita

- CFC/No Frost/Bio Shield • 2 Door Cooling™ • Door Cooling
- Magic Crisper™ • EasyGet Tray™ (Twist Ice Tray)

DINAU PRAIS K3,445

BAIM BIPO LONG 30 Dei bilong SEPTEMBER na WININ FANTASTIK "DIRIMA PRAIS" insait long GOL RAS 2ND KOTA DRO!

YU MAS STAP ISAIT LONG DRO LONG SPINIM NA WINIM!

K600,000.00 INAPIM KES MONI NA PRAIS!

Baim wantaim K50 long ol Courts Supastoa klostu yu, long "kamapim driman bilong yu" long ol Bikpela dro!

GOLD RUSH Live your dream!

INSTANT CREDIT APPROVAL CONDITIONS APPLY

REQUIREMENTS

- CONFIRMATION LETTER
- Current Employment Letter
- ID CARD
- Current Employment ID Card
- LATEST PAY SLIP
- Latest bank statement (if applicable)
- ADDRESS CONFIRMATION
- Latest PPL Power of SDA BAHU (if REFERENCED DETAILS Names, Addresses, Phones, etc.)

COURTS

FEIVARET FENISA NA ELEKTRIKOL SUPASTOA BILONG PAPUA NIUGINI

POWERHOUSE SWITCH ON TO STIMULATE YOUR SENSES

PEIM ISI Dinau Prais

COURTS GORDONS Spring Garden Road, Gordons Phone: 302 5808 • Fax: 325 4149	COURTS LAE Millfordhaven Road, Lae Phone: 472 4600 • Fax: 472 4621	COURTS GOROKA Fox Street, Goroka Phone: 732 2033 • Fax: 732 2063	COURTS MT HAGEN Hagen Drive, Mount Hagen Phone: 542 1401 • Fax: 542 3517	COURTS MADANG Recksea Plaza, Nanulun Street Phone: 852 3711 • Fax: 852 3612
---	---	---	---	--

Polis fos bai kisim ol nupela yunifom

Desney Koimo i raitim

OLGETA polis manmeri insait long kantri bai kisim nupela yunifom bilong ol pastaim long yia 2004 i pinis.

Komisina bilong Polis, Sam Inguba, i tokaut long dispela taim Gavman bilong Australia i bin givim helpim long mani mak inap long K3.26 milien aninit long AusAid program.

John Davidson, husat em i Hetman bilong Australian Aid insait long Papua Niugini, i givim tok orait pinis long mani long go insait long Dipatmen bilong Polis long baim ol nupela yunifom.

Komisina Inguba i tok dispela ol yunifom bai kirapim tingting na laik bilong ol polis manmeri long mekim wok bilong ol insait long kantri.

Deputi Komisina bilong Polis Edministresen, Tom Kulunga, bai raun i go olsem long Australia na Fiji long bungim ol lain husat i save splaim ol opis yunifom bipo long ol i stretim ol tenda bilong ol kampani husat i ken splaim ol yunifom insait long kantri na tu long ovasis.

Komisina Inguba i tok ol i laikim ol gutpela yunifom i makim stret prais ol bai i baim na tu i mas gutpela na strongpela.

Em i tok ol polis manmeri i holim wok bilong strongim lo na oda insait long kantri na i mas luk smat long karimaut wok bilong ol wantaim gutpela tingting.

Kanda rop fenisa long Wamasu Salamaua i kamap gut

...Helpim ol yangpela

WANPELA yangpela manki, Ruben Yakam insait long Wamasu viles long Salamaua i wokim kamap gutpela dabol sia na singel sia wantaim arapela samting long rop bilong kanda bilong bus. Em i save salim long ol manmeri na bisnis haus insait long Lae siti long Morobe provins.

Mista Yakam i tokim *Wantok Niuspepa* olsem ol samting em i wokim i save wara ron stret we ol kastoma bilong baim ol kanda sia i save pinisim tru ol sia bilong em.

Em i tok dispela wok bilong wokim fenisa sia long kanda rop em i bikpela wok tru long mekim we em i save baim ol yangpela manki bilong ples long helpim em katim ol bikpela kanda rop insait long bikpela bus bilong mipela long kisim i kam long wokim sia.

Ruben i tok, wokim sia long kanda rop em i bikpela hatwok tru na i gat baksait pen, han pen, na tu i save i gat bikpela tuhat bilong em tu.

Ripot *Wantok Niuspepa* i kisim long Mista Yakam i olsem tu dispela wok kanda rop i save kisim olsem wanpela mun na wanpela wik long pinisim na karim i go aut long salim long Lae siti.

Plantu kanda sia bilong em ol Huon Kredit Skim long Lae taun save long salim long ol bikmanmeri long opis ol i save long ol na pablik wantaim ol turis i kam long ovasis. Yakam i tok, dispela yia tasol wanpela bikpela sip bilong ol turis MV *Elizabeth Quine* i kam long kantri long Lae siti ol i bin baim sampela na sampela i bin stap bek we em yet i salim isi isi long ol bisnis haus long Lae.

Em i tok, sia wok ol i wok long wokim yet plantu i stap sapos oda o yu husat i laikim kain ol sia long haus bilong yu o opis bilong yu na long ol ges haus na hotel yu ken lukim ol Huon Kredit Skim opis long Lae na askim long kanda sia bilong Ruben Yakam.

Kanda sia bilong Ruben Yakam i gat kain kain stail bilong en we sampela em i wokim bilong ol waitman na meri long slip arere long swimming pul long san, bilong hotel long sindaun dring, o bilong pati o opis we em i save mekim na tu klostu em bai salim long ovasis tu long ol ples olsem Melesia, Indonesia na ol arapela Pasifik ailan kantri long maket bilong em.

Nau yet em i wok long painim sapot long helpim long wanem mani tasol i hat long helpim em long salim ol dispela sia bilong em long i go long ovasis maket.

Mista Yakam em i wanpela pikinini Morobe insait long Salamaua long Wamasu ples we gavman bilong Morobe provins i mas luksave long ol kain yangpela yut bilong Morobe insait long liklik ples o taun.

Laik bilong papamama em bikpela samting

Meri Wantok i bringim kam stori bilong wanpela mama na pikinini man bilong em husat i bin kisim bagarap long smok mariwana. Dispela em longpela stori na mipela brukim i go tupela hap. Narapela hap bai yu ken ridim neks wik.

Toksave i go pas

I GAT faipela pikinini meri na tupela ol boi. Tasol papamama i save laikim tumas ol meri na i no ol boi. Wanem dispela yangpela boi yumi tok nem bilong em Tony i laikim, papamama i no save givim em. Olsem na Tony i stat long raun nating nating wantain ol pren long strit na smokim spak brus. Famili bilong em i panim olsem na ol i ting em samting bilong ples o kastom. I no long taim Tony i stat long lus tingting long ol samting na dispela i kamapim bikpela hevi.

Hla mama bilong Tony i stori :

Taim em i kisim drag, mi lukim em mi ting olsem sampela ol lain bagarapim em. Olsem na mi tingting planti. Mi tokim man bilong mi, yumi painim sampela we na givim mani long marasin man (witchdoctor) na ol bai helpim. Tasol pikinini meri bilong mi i tokim mi - "nogat mama yumi mas kisim em i go long haus sik. Em i luk olsem, em i kisim smok nogut - mariwana". Olsem na mipela kisim em i go long haus sik. Dokta i lukim em na tokim mi olsem - pikini-

ni em kisim drug na mipela lusim long han bilong dokta. Dokta i tok em bai kisim marasin, na bihain mipela i ken kisim Tony i go bek long haus sik long Laloki. Em stap tupela wik long hap.

Taim em i kam daun mipela olgeta famili sindaun, toktok wantaim, na soim laik bilong mipela, hau mipela tritim em olsem em raun na mipela i luksave olsem em go rong pinis, mipela mas laikim em, givim gutpela kaikai, na wasim em, mipela wokim olsem, taim em i kisim marasin, nau em i senis nau, em kamap gutpela gen. Mipela lukim olsem, mipela amamas na mipela tok yes em kisim drag. Nau pikinini em stap long rehab center o senta bilong kamap orait. Nau em orait i em go kam, em yet em bai waswas, sampela taim em kuk na kaikai.

Tony i bin stat long smok taim em i skul long vokesenel school- taim em i gat 16 kris-mas. Tupela yia bihain em i stat long kisim sik longlong.

I gat planti ol sain o mak long luksave sapos wanpela man i smokim drag. Ol dispel em: Ol i no save waswas,

raun raun long rot nogat waswas, na bihain i save kros na pait sapos em i laikim samting na yu no givim em.

Mama bilong Tony i tok: Bipo mi lukim, em gutplea pikinini, em save harim toktok bilong mipela. Taim em kisim drag, sampela taim em go long skul, em save slip, na tu em i no save go hariap. O taim em i go long skul em save silip long klasrum. Tisa i lukim dispela na i tokim papa na papa askim Tony, bilong wanem na yu no save go long skul? Sampela taim mipela save ronim em go long skul na tokim em long noken mekim olsem. Taim em kisim smok em i no save harim tok-tok bilong mipela. Em save kam na pait wantaim mipela, especially mi, mama.

Mi save tokim em, pikinini mi no laik yu wokim olsem, nau em bai tanim na paitim mi. Planti taim em paitim mi i go go, bihain mipela painim olsem em i kisim smok nogut.

Neks wik bai yumi painim aut rot famili i kisim long traim helpim Tony.

Dispela stori i bin kamap long redio long Tokstret Radio Program bilong YWCA.




• Ol meri i bin kisim sapat bilong ol man long taim ol i protes mas long Tabari i go long Waigani long givim petisen i go long Praim Minista long ol kainkain hevi we i wok long bagarapim ol meri na ol pikinini.

Kisim save long SKUL BILONG LAIP



OLGETA I GO LONG HELT SENTA...



• Mipela inap long pilim poret long seifti bilong mipela em het tok bilong dispela protes mas we i bin kamap long Pot Mosbi. Ol foto: BARBARA TOMI



MINS NA GRINS

Yu mas i gat:
500g bif mins
2-pela tebol spun Traditional Gravox
500g kapis katim liklik
6-pela strin bin slaisim
1-pela kerot slaisim

- 1-pela bikpela anian slaisim
- 2-pela tomato slaisim
- 1-pela kapsikam katim
- 1-pela tebol spun wel
- 1-pela kap wara

We bilong Kuk:
Kukim mins mit long wel inap em tanim braun,
Putim anian na fraim isi isi inap em i malumalu,
Putim slais tomato, kerot, string bin na kapis.
Kukim inap 3 minit olgeta na bihain rausim gris long fraim pen,
Miksim Traditional Gravox wantaim wara na kapsaitim i go insait long pen.
Kukim isi isi inap long 20 na 30 minit.
Kaikai wantaim spagetti o rais.

Meri Wantok i laik save sapos yupela i save laikim ol stori mipela i save printim. Rait i kam long Meri Wantok, Word Publishing Company, PO Box 1982, Boroko, NCD o ring i kam long telipon 325 2500 na toktok long Veronica Hatutasi o Barbara Tomi. Yu ken salim ol stori tu long email: word@global.net.pg.

TOKTOK NATING
Wantaim
Fr. Paul Liwun SVD



INSAIT long wanpela peris bilong wanpela daiosis, i gat tupela famili i stap olsem neiba tasol ol i bin kros pait na i no toktok long narapela narapela. Planti yia i go pinis na tupela i stap olsem tasol.

Wanpela bilong ol, nem bilong em Dominik, i bin kism bikpela sik na slip tasol long haus. Meri bilong em i wari tumas na singatim pater na i tokim pater olsem: "Man bilong mi Dominik i bin tok kros pait wantaim Leonard, neiba bilong mipela na tupela i no toktok. Tupela i stap birua tasol. Long dispela as tasol, Dominik i kism bikpela sik na klostu indai nau. Inap yu kam na stretim wari bilong ol?"

Taim Pater i toktok wantaim Dominik pinis, em i grisim-Dominik long singautim Leonard i kam bai tupela i sekan na kamap wanbel gen.

Meri bilong em i hariap i go ausait na singautim Leonard i kam. Leonard i sindaun long sait bilong bed na askim Dominik long sekan na kamap wanbel gen wantaim em. Leonard i askim Dominik long lusim tingting long olgeta rong bilong tupela bipo.

Dominik i tok orait long kamap wanbel wantaim Leonard. Pater na meri bilong Dominik i amamas tru. Tupela i sekan na Leonard i lusim ol.

Tasol taim Leonard i go kamap klostu long dua, Dominik i bikmaus na singaut na i tok; "Tingim gut Leonard! Pasiin wanbel bilong yumi em bai kamap sapos mi dai. Sapos mi no dai, pasin birua bilong yumi bai stap olsem yet."

Pasin bilong pogivim ol narapela i no wanpela isi wok na i no sip. Taim ol manmeri i mekim nogut long yumi, bel bilong yumi i no save pilim amamas. Bel kros i go long ol manmeri i mekim nogut long yumi i save kamap.

Strongpela bel kros i save kamap na mekim asua i stap insait long bel bilong yumi. Pasin pogiv, em i wanpela bikpela samting i stap insait long olgeta skul bilong olgeta lotu/riligen antap long dispela graun. Bikos sapos i nogat laik pasin i stap, bai yumi inpa painim pasin pogiv tu.

Olsem na Jisas i bin askim ol disaipel bilong em (yumi tu) long laikim olgeta manmeri na tu laikim ol birua bilong yumi. Bikos trupela MAK bilong Kristieniti em i LAIK PASIN (LOVE), na bel bilong Kristieniti em i LOVE, laik pasin. Pawa bilong LOVE, em i POGIV. Jisas i askim yumi long pogivim seventi taim seven (70X7).

As bilong dispela tok bilong Jisas i olsem, olgeta taim yumi mas redi log pogivim narapela narapela. Pasin bilong pogiv bilong ol Kristen manmeri i no wanpela samting bilong wokim long wan wan taim. Nogat. Pasin bilong pogiv i mas stap pas wantaim Kristen manmeri long olgeta taim.

Yumi olgeta i save olsem pasin pogiv em i no wanpela isi wok, tasol em i save mekim gut bel bilong yumi na kamapim gutpela sindaun long komyuniti. Birua pasin i save bagarapim yumi yet bilong wanem em inap long bringim sik na hevi long yumi yet na long ol narapela.

Luluk long kantri bilong yumi i gat kain kain hevi na wari i stap. Yumi Kristen manmeri i stap insait long dispela Kristen kantri tasol yumi no soim laip bilong yumi long Kristen we. Sapos pasin pogiv i no stap, bai yumi stap olsem tasol.



"Pasin bilong laikim birua"

Jisas i tok moa olsem, "Mi tokim yupela ol man i save harim tok bilong mi, yupela i mas laikim ol birua bilong yupela, na yupela i mas mekim gutpela pasin long ol man i save bel nogut long yupela. Na sapos sampela man i tok long God i ken bagarapim yupela, yupela i mas askim God long mekim gut long ol. Na yupela i mas beten bai God i marimari long ol man i mekim nogut long yupela. Sapos wanpela man i solapim wanpela wasket bilong yu, orait yu mas tanim narapela wasket tu i go long em. Sapos wanpela man i pulim saket bilong yu, orait yu mas larim em i kism siot bilong yu tu."

Luk 6: 27-29

Ol Melanesia tisa sindaun long woksop

BIKPELA samting we wanpela bung bilong ol Katolik Rilijes i bin lukluk long en em long luksave long Melanesian rot long helpim ol taim ol i stap long trening skul long ol wanwan seminari haus.

Wanpela wan wik woksop long "Melanesian Formation and Spirituality", em ol bin kamap long Kefamo Konfrens Senta long Ogas 18 inap long de namba 23.

Ol i save holim dispela kain woksop long wanpela taim insait long wanpela yia aninit long Rilijes Federesen bilong PNG na Solomon Ailan. Ol lain Rilijes i save kam long PNG na Solomon Ailan.

Woksop bilong dispela yia i bin sut long helpim ol Melanesian Fometa o ol lain i save skulim ol seminari o tisa na ol arapela rilijes manmeri long luksave moa long bihainim Melanesian rot na kism sampela long ol gutpela samting na yusim insait long wok, skul na trening bilong ol long seminari na ol rilijes haus.

Ol fometa i bin lukluk tu long sampela spirituel samting insait long pasin tumbuna bilong Melanesia we ol i ken bungim wantaim long Kristen



Ol tisa i bin sindaun long woksop long Kefamo Konfrens Senta long Goroka. Foto: FR PHIL GIBBS SVD.

bilip na mekim Kristen bilip i kam gut long ol pipel bilong mipela long Melanesia.

Ol woklain i bilong Melanesian Institut we Pater Philip Gibbs SVD i go pas long en.

Em i bin kism helpim long ronim dispela woksop long ol arapela wanwok olsem Sister Jeline Girls SMSM, na Pater Henry Paroi OP.

Ol i bin givim ol toktok we i bin strongim na opim tingting

bilong ol fometa na ol i bin go bek long ol wanwan seminari na rilijes haus bilong ol.

Samting olsem 48 fometa i bin sindaun long dispela woksop we ol i bin lainim planti samting.

Yut bilong sios i mas soim gutpela piksa

Paulus Tali i raitim

PRESIDEN bilong Evenjelikel Luteran Sios (ELC) long Papua distrik, Reveren Sommy Setu, i bin opim namba 24 yut konfrens long Kirap Bek kongrisesen las wik na i bin i tok olsem ol yangpela bilong sios tete i mas kamap olsem ol rol model o gutpela piksa bilong sios.

"Yupela i ken mekim wok tasol wok i mas go het wantaim gutpela luksave long kongrisesen seket distrik," em i salensim ol yut.

"Nau yet planti ol yangpela i no

save bihainim stret straksa bilong sios progrem na ol i paulim planti ol narapela yangpela bilong tete.

Dispela i kamap bilong wanem asua i stap long ol lida bilong wanwan grup long wanem ol i no save strongim tingting long wok bilong ol "em i tok.

Reveren Setu i amamas long salens we baibel stadi masta, Pasto Giedisa Yaing, i bin mekim i go long ol yangpela.

Em i bin tok olsem tru yumi ol manmeri bilong tete i gat planti samting tasol yumi no save ting-

ing long helpim narapela olsem na bilip bilong yumi i sot yet.

Em i bin tok strong long ol yut long senisim laip na kamap gutpela Kristen tru.

Moa long 350 yut long Papua distrik i bing kamap long pinisim bung. Em mak long 9-pela kongrisesen insait long Nesenel Kapitel Distrik (NCD) na Popondetta we i stap insait long Luteran Papua Distrik.

Bikpela gutpela lotu i bin kamap we Vais Presiden, Reveren Gundu Karl, i bin go pas long en.

Sauten Hailans Katolik Sios bai amamasim 50 yia

...Bikpela Misa Lotu bai kamap

KATOLIK Sios long Sauten Hailans bai amamasim Silva Jubili o 50 krismas bilong en long Septemba 10.

Mendi Daiosis bai kamapim ol selebresen long Sande Septemba 12.

Dispela bai i stat wantaim bikpela Misa Lotu long Sande.

Bihainim dispela, daiosis bai kirapim ol pastorel rinyuwel progrem bilong wanpela yia na dispela bai karampim Nesenel Visin, Misin na Praioriti plen we Katolik Sios insait long PNG i bin toktok long en insait

long Jenerel Asembli bung las mun.

Bisop Stephen Reichert OFM Cap bilong Mendi Daiosis i tok Wanpela Sacred Hat misinari pater nem bilong em Jean Delabarre MSC.

Baibel riting bilong dispela de i bin kamapim bikpela tingting long dispela de i bin tok, "Yupela liklik lain sipsip yupela i noken pret. Papa bilong yupela em i tok pinis long em bai i stap king bilong yupela na givim kingdom bilong em long yupela (Li: 13-32)

Bisop Stephen i tok



Ol manmeri i redi long amamas na sam-sam olsem long dispela long poto.

dispela tok profet i long Sauten Hailans i kamap tru moa yet nau wok long gro bikpela taim Katolik Sios insait hariap na i stap laip

Kirap Bek
gat nupela
eksekyutiv

Paulus Tali
i raitim


KIRAP Bek Luteran Sios long Evenjelikel Luteran Sios long Papua distrik i makim ol nupela eksekyutiv bilong ronim wok bilong sios

141 sios memba olgeta i bin makim siaman, seketeri, tresera na projek siaman bilong sios long wanpela ileksen.

Tripela man husat i resis long siaman posisen em, Sakau Langa, Tony Wari na Nathan Nalau na ol i winim bek sit bilong ol. Mista Nalau i kism 108 vot na i kism posisen bilong siaman na posisen bilong vais siaman i go long Mista Sakau. Binga Saunga i kism seketeri posisen na namba tu bilong en em Kenny Gumaru. Perry Sam i bin kism bek posisen bilong tresera gen.

Pasto Martin bilong i amamas na tokim ol Kristen olsem em i spirit bilong God i wok tru long ol manmeri long makim ol lida.

Jonathan Sote kaunsel lida bilong Kirap Bek, i tok kongrisesen i laikim lida i mas wok wantaim.



Ministri bilong Higher Education, Research, Science na Technology



Singaut i go long Pablik long autim tingting long Wok bilong Higher Education, Research, Science na Technology long 2006 i go inap 2015

1. Ministri bilong Higher Education, Research, Science na Technology (MHERST) i wok long lukluk bek long 2000-2004 National Higher Education, Research, Science na Technology Namba Tu. Komisn bilong Higher Education (CHE) i go pas long higher education, research, science na technology plen na rivi u o lukluk bek bilong en. Rivi u long dispela plen em long luksave long ol hevi, ol bikpela samting na ol salens i stap long taim bilong karimaut dispela plen na ol bikpela samting long haia edukesen tete. Ol samting i kamaut long dispela rivi u bai helpim CHE long kamapim wanpela arapela plen gen (National Higher Education, Research, Science na Technology Plen Namba Tri, 2006-2015).

Mi askim yu long givim tingting bilong yu - long pablik wan taim ol yunivesiti na koles kaunsol, ol tisa na leksera na ol wok manmeri; ol opis i save mekim wok risets; ol ruel komyuniti grup; ol meri grup; ol provinsel gavman; ol lokol level gav man; ol sios; ol bisnis; ol ovasis dona ejensi; ol profesenel asosiesen; ol alumnai o olpela sumatin asosiesen; ol sumatin na ol papamama; na ol arapela manmeri tu. CHE bai bungim olgeta toktok na tingting bilong yupela long kamapim wanpela plen bilong soim rot bilong Higher Education, Research, Science na Technology. Dispela kain luksave long soim rot i mas kamapim tu ol nesenel developmen driman na tok klia long wok Minista bilong HERST i mas mekim long luksave long ol bikpela nesenel as tingting olsem 4-pela pos bilong developmen.

2. *Ol toktok i mas lukluk long ol bikpela samting olsem:*

- Driman na as tingting bilong Higher Education, Research, Science na Technology (b) Sans bilong olgeta long kisim haia edukesen;
- Strong bilong save bilong ol tisa, kisim skul na mekim wok risets;
- Strong bilong kurikulum o skul long sait bilong PNG;
- Ol risos bilong Higher Education, Research, Science na Technology
- Strepela rot bilong menesmen bilong ol dispela skul;
- Wok bilong higher education, research, science na technology bai bekim ol nesenel developmen prairiti; na
- Wok bilong Higher Education, Research, Science na Technology long wok bihainim ol samting komyuniti na kantri imas i laikim.

3. *Rifom o senisim haia edukesen*

Wanem kain senis long polisi i mas i kamap long mekim

higher education wanpela bikpela opis long go pas long nesenel developmen insait long 10-pela yia bihain? Olsem wanem stret bai higher education inap long mekim wok we inap karim kaikai long olgeta sekta bilong sosaiti?

Higher Education, Research, Science na Technology inap long helpim komyuniti na inap long kisim helpim long wanem ol rot:

- Developmen long kamapim tingting bilong wok bisnis inap kamap sapos olgeta nesenel yunivesiti na risets skul i kisim wankain risos.
- Kamapim ol liklik maket?
- Opim rot i go long skul na enrolmen?
- Strongim haia edukesen long olgeta hap?
- Strongim wok risets na developmen long kamapim sosol na ekonomik developmen insait long PNG?
- Bekim ol kain kain senis long wol?
- Strongim ol skul bihainim pablik, prairvet, yunivesiti na tupela yia yunivesiti tasol?
- Promotim resis namel long ol yunivesiti?
- Strongim na sapatim wok bung namel long ol yunivesiti i stap insait long kantri na ol yunivesiti i stap ovasis?

4. *Plis putim tu wanem kain toktok bilong yu we yu skelim olsem em i bikpela long developmen bilong PNG Higher Education sistem.*

Ol pas i mas i go long Dairekta Jenerel

Attention:

**Director, Higher Education Development Division
Policy Development Planning Team
Office of Higher Education
Okari Street, Watkins Mall
P. O. Box 5117
Boroko, NCD**

Em bai moabeta sapos olgeta bekim i kam kamap long plening tim pastaim long pinis bilong mun Oktoba 2004.

Tok orait i kam long:

**Dr. Phillip Kereme (PhD)
Dairekta Jenerel, Opis bilong Higher Education**

Ol stori bilong namba wan bon de bilong Katolik Redio Netwok wantaim Veronica Halutasi

Katolik Redio Netwok amamasim wanpela yia

I gat hevi long pasin long PNG

...Ol sios mas wok bung wantaim

Katolik manmeri i mas soim gutpela pasin we planti lain i lusim tingting long en," Sir Michael i tok.

KATOLIK Redio Netwok (CRN), wanpela stesen we i karim ol Kristen progrem insait long kantri, i bin amamasim namba wan yia bilong en long wok long las Sande, Ogas 29.

olsem long sampela yia. Na bihain long ol samting i stret na i gat inap mani long mekim dispela wok, ol i bin kirapim wok isi isi long Pot Mosbi studio las yia Ogas 29 na wok brotkas long 24 awa i bin kirap stret long mun Septemba.

yet we i ken givim stia long ol spirituel, sose na humen developmen sait i go long ol pipel long dispela kantri.

Mark, ol progrem bilong Dokter Scott Hahn, Catholic Jukebox o ol sios musik bilong Katolik na St Joseph Redio.

Konfrens bilong ol Katolik Bisop long PNG na Solomon Ailan i bin gat tingting long kirapim wanpela redio netwok

Konfrens bilong ol Katolik Bisop (CBC) i bin kirapim wanpela redio netwok bilong em

Mama Stesen em dispela i stap long Pot Mosbi we i save givim 24 awa sevis na sampela katolik daiosis long kantri i gat link we i kisim brotkas long daiosis na provins bilong ol. Em long Rabaul Asdaiosis we i gat link long Malmaluan FM transmisa stesen long Rabaul, Is Nu Briten, Aitape, Vanimo, FM Trinity long Hagen Asdaiosis na Kundiawa.

Ol lokel progrem em Tokstret em HIV/AIDS progrem bilong Fr Jude OFM, Catholic Insight wantaim Asbisop Sir Brian Barnes, Sunday Eucharist na Lord's Vineyard. Ol bai kamapim moa lokel progrem taim olgeta samting i stret na i gat gutpela wok bung namel long ol Katolik manmeri na ol institusen.


"PNG i gat bikpela hevi long pasin (attitude problem) na olsem ol Katolik, yumi mas soim gutpela pasin long kamapim sampela gutpela senis," Praim Minista sSr Michael Somare i tok.

Em i tok wanpela gutpela piksa we sios na gavman i wok bung wantaim em long Is Nu Briten provins we gavman na sios i wok gut wantaim long kamapim ol wok developmen na ol helt na edukesen sevis.

Em i bin askim tu ol sios long wok bung wantaim.

Sir Michael i bin tok redio netwok bilong Katolik Sios bai helpim gut long kamapim ol wok na i no long pasin bilong daunim wanpela arapela sios long kantri.

"Planti bilong yumi i lusim tingting long gutpela pasin, gutpela luksave (self respect) na mesej em, yumi olsem



Sir Michael na Apostolik Nunsio, Asbisop Aldofo Tito Yllana, i katim kek long amamasim namba wan bon de bilong CRN. Foto: JOE IVAHARIA

Bisop Cesare Bonivento husat i deputi bilong Sosel Komyunikesens (SOCOM), we i go pas long wok bilong CRN, i bin hariap long putim FM treshmita long daiosis bilong em blong wanem i nogat inap pater long daiosis. Na ol Katolik pipel i stap long ol longwe ples wantaim nogat pater i ken harim Gutnius, pre Korona na harim ol arapela Kristen progrem long CRN.

Planti lain i wok long ring na salim toksave olsem ol i amamas long harim ol progrem we CRN i kamapim. Sampela lain long ol ovasis kantri olsem Japan, Wes na Not Amerika, Jemeni na Salzberg long Austria na tu insait long PNG olsem Wewak, Kubuna long Sentral provins, i salim tok amamas na tok ol i save kisim gut treshmita na ol progrem.

Long nau, CRN i save kisim ol progrem bilong en long ol arapela susa Katolik redio brotkas stesen long wol olsem Eternal Wod Television Netwok (EWTN) long Alabama, Amerika. Ol progrem we i save kamap long dispela netwok brotkas na i ol Katolik pipel long PNG i save harim em ol toktok long Skriptja o Scripture Matters, Journey Home, Gospel of

Bisop Bonivento i tok redio em i strongpela rot long salim na kisim toktok we planti pipel long ol longwe hap na busples i save harim long en.

Yusim redio na ol progrem long senisim pasin

"YUMI putimaut ol gutpela toksave na kisim ol pipel na ol i ken klia moa long ol samting na tu, senisim pasin bilong ol i kamap gutpela. Na redio em i wanpela strongpela na bikpela rot we i ken helpim long senisim pasin bilong ol pipel long ol komyuniti na kantri," Praim Minista Sir Michael Somare i bin tokaut long dispela long wanpela yia bon de bilong Katolik Redio Netwok (CRN-PNG).

Taim em i autim tok amamas long Katolik Sios na ol sapota bilong em long kirapim redio netwok, em bin tok redio em i gat bikpela pawa.

"Long skruim Tok bilong God na ol arapela toksave we bai senisim na kamapim gut laip na sindaun bilong man i stap long ol longwe hap na busples, redio em dispela rot we sios na gavman i ken yusim," Sir Michael i bin tok.

Em i bin tok tu olsem PNG i save bihainim ol kisim ol samting i karamapim tu planti redio progrem ausait long ol samting we i no fit long laip na sindaun bilong yumi.

Em i bilip olsem CRN-PNG i no inap wokim dispela tasol karimaut ol toksave we bai helpim kamapim gutpela senis insait long sosaleti.

Redio gat pawa

...Autim Gutnius long en

OKSILERI Bisop bilong Pot Mosbi, Cherubim Dambui, husat i bin go pas long lotu bilong amamasim wanpela yia bilong CRN-PNG i wok, i tok em i amamas long redio netwok i karim Tok bilong Bikpela i go long ol pipel na dispela Tok i ken kamap strong long redio.

bin tok Bikpela i wok long givim pawa na strong i go long ol lei manmeri (ol manmeri nating na i no ol rilijes) long karimaut wok bilong em. Dispela wok i go long ol lei manmeri i bin kamap strong bihainim pas bilong Pop John Paul 2 long 2002 ol i kolim long "Novo Milenium".

Samting olsem 100 pipel i bin stap long seremoni we i bin kamap long CRN-PNG studio long Is Boroko.

Bisop Cherubim i bin tok long taim bilong amamasim namba wan yia bilong CRN-PNG, em i taim tu long tok tenkyu long gat kain ol nupela teknoloji o masin we i helpim yumi long autim Tok bilong Bikpela.

Praim Minista Sir Michael Somare na meri bilong em Ledi Veronica Somare i bin stap long dispela bung. Nunsio i makim maus bilong Pop Paul 2 em Asbisop Aldofo Tito Yllana wantaim Asbisop bilong Pot Mosbi Asdaiosis Sir Brian Barnes, sampela pater, ol rilijes, ol strongpela sapota bilong Katolik Sios na ol wok i kamap long daiosis olsem olpela politisen Bernard Narokobi na ol arapela bik manmeri, ol woklain bilong RTA na CRN-PNG na ol arapela poro manmeri i bin stap insait long bung.


Long wankain taim tu, em i bin tok wok bilong evanjelaisesen em i bilong olgeta Kristen bilip manmeri na i no bilong ol pater, bisop na ol rilijes.

Long toktok bilong em, Bisop Cherubim i

Em i tok ol misinari bilong ausait i bir' kisim wok na Tok bilong Bikpela i kam na ol i planim wantaim bikpela hatwok. Nau em i taim bilong ol PNG manmeri long skruim dispela wok.

Na em bin tok tu olsem PNG i wok long salim ol misinari i go long ol narapela kantri.

Amamas na Singsing



Ol lain long Waigani Katolik peris i bin kamapim ol gutpela singsing long lotu bilong amamasim namba wan yia bilong CRN. Selebresen i bin kamap long Is Boroko we mama redio studio i stap long en. Foto: JOE IVAHARIA

Liklik histri bilong CRN - PNG

KONFRENS bilong ol Katolik Bisop (CBC) i bin kirapim Katolik Redio Netwok (CRN-PNG) bihainim ol wok stadi we SOCOM i bin karimaut sapos netwok bai go gut na i gat inap mani long ranim ol wok operesen bilong em. Bisop bilong Vanimo Cesare Bonivento i bin kisim mani helpim long kirapim CRN-PNG na ol wok i bin go het long Ogas las yia.

Julai 2003 - Namba wan treshmita long Is Nu Briten taim namba wan brotkas i kamap long Nesenel Katolik Yut Pilgrimej

Long Oktoba 2002, Bisop Bonivento i bin tokto wantaim Rilijes Televisen Asosiesen (RTA) we Pater Zidslaw Mlak i go pas long en sapos ol i ken helpim long kirapim na lukautim wok bilong CRN-PNG. Ol deit we ol wok long kirapim CRN-PNG i bin kamap.

Julai 2003 Namba wan laip tes brotkas long pinisim Pilgrimej lotu bilong ol Katolik yut long Rakunai

Me 2003 - Bung bilong CBC i bin tok orait long givim wok long RTA i kirapim na menesim CRN.

Ogas 2003 Namba tu tes laip brotkas long selebretim 25 anivesari bilong Asbisop Karl hesse long Rabaul Asdaiosis.

Me 9, 2003 - CRN-PNG i bin kisim tok orait long Pangtel long kisim Komyuniti Laisens long karimaut tes brotkas.

Ogas 2003 - FM 103.50 treshmita long Pot Mosbi em ol i switsim o kirapim long wok.

Septemba 2003 - Satalait link wantaim Rabaul long kirapim wok treshmita long Rabaul Asdaiosis, Vanapope.

Oktoba 2003 - Sotwev treshmita long Vanimo long FM92.90 em ol i kirapim.

Jun 2004 - Kirapim sotwev treshmita long Vanimo aninit long frikwensi 4960KHz.

Ogas 2004 - Porgera i joinim netwok.

Ples man wari long ol yut

Andrew Molen i raitim

WANPELA fama na man bilong ples i autim wari bilong em long ol yut na ol yangpela manmeri husat i wok long stap nating na i nogat wok bilong ol long ol taun na siti.

"Mi lukim planti yangpela manmeri i raun nating na nogat wok bilong ol na mi wari olsem ol i mas go bek long ples na wokim sampela samting," David Towa bilong Goroka long lsten Hailans provins i tok.

Em i tok long ples ol i gat planti samting long wokim we ol i ken painim liklik mani long was long sindaun bilong ol.

"Ol kain samting olsem lukautim pik, kakaruk, pis, planim kopi na wokim gaden em i gutpela long helpim na stretim sindaun bilong ol," Mista Towa i tok.

Mista Towa i tok em i kam daun


long Pot Mosbi long mekim sampela liklik wok bilong em yet na long liklik taim em i stap em i tok em i wari long lukim planti ol yut i raun nating.

"Dispela em namba wan taim bilong mi long kam long Pot Mosbi na mi lukim olsem siti laip i hat tumas.

"Mani i stap long ples," em i tok.

Mista Towa yet i go skul inap long gret 6 na bihain em i go long teknikel skul na nau em i gat ol gaden kaikai na kofi gaden, pis fam, ol kakaruk na pik.

"Wanem liklik save mi kisim long em mi yusim long helpim na lukautim sindaun bilong mi na mi laikim bai



Mista Towa, ol yangpela husat i stap nating long taun i mas wokim wankain."

Mista Towa i tok.

Em i tok ol i stap long taun bai ol i painim trabel na polis i ken sutim ol i dai.

"Singaut bilong mi i go long ol skul manki na ol lain husat i stap nating bilong wanem i gat planti save man tasol i nogat inap wok bilong olgeta.

"Yupela i ken stap long ples na taim yu gat mani nau yu ken kam raun long taun na bihain go bek gen long ples," em i tok.

Mista Towa i sapotim tu toktok bilong olpela Deputi Praim Minista

Moses Maladina long strongim wok agrikalsa insait long kantri.

"Gavman i no ken westim mani long ol samting i nogat kaikai long ol na putim mani long Dipatmen bilong Agrikalsa na Laipstok we ol bai inap long helpim ol lain bilong ples long baim haus kapa o paip na ol samting long helpim wok bilong ol fama na ol lain long ples long helpim wok bilong ol i go het.

"Dispela bai pulim ol yut na ol lain i stap nating long ol taun na siti long kam bek long ples na sindaun gut," Mista Towa i tok.

PEASF peim K20,000 long famili

Michael Novingu i raitim

LAS WIK Pablik Employas Asosiesen Supaenuesen Fan (PEASF) i peimaut K20,000.00 i go long famili bilong Leit komyuniti helt woka Gubuk Uran.

Kwara Lewa bilong PEASF long Pot Mosbi yet i kam na i givim dispela mani i go long Misis Kurunag Gubuk wantaim tupela pikinini bilong em.

Bosman bilong ol Helt Sevis long Madang, Marcus Kachau i singaut strong i go long ol helt woka na komyuniti helt woka long Madang provins long joinim dispela supaenuesen fan.

Dispela fan i gutpela long taim yu kisim bagarap long wok o i dai ol famili bilong yu.

Simuk paket, skin na spet buai i bagarapim Lae

YOWAKICTE BUAFEC i raitim

PLANTI bikpela ples insait long Lae siti long Morobe provins olsem top taun bas stop na 8 Strit hap bilong hos resis na arere long Edward Wong stoa i bagarap tru.

Ol i kamap olsem maket ples we ol manmeri i save spetim buai long bas stop hap na long ol wol bilong stoa na i mekim hap i kamap olsem pipia ples olgeta.

Ol manmeri i save salim buai na simuk bilong ol na mekim dispela ol ples na strit bilong Lae i kamap olsem maket ples na klostu olgeta gutpela opis olsem Morobe Provinsel Gavman het kota na arapela ol opis long Lae bai i pulap long pipia bilong skin buai na spet buai we i mekim ples i bagarap olgeta.

Spet buai i bagarapim tru Lae siti na i pulap stret long Lae top taun bas stop na ol strit bilong Lae olsem 8 Strit na pablik toilet, Best Buy stoa namel long stua we skin buai nau i pulapim olgeta kona long ai bilong pablik, ovasis lain i kam long arapela kantri i lukim na tu i bagarapim ol bisnis haus na ol bikpela opis.

Ripot i kam long Lae Siti Kaunsel Opis wantaim ol siti kaunsel sekyuriti i tok ol wantaim ol siti kaunsel sekyuriti wokman bilong lukautim siti long ol kain samting olsem long rausim ol manmeri o strit lain husat i save brukim lo bilong siti na salim ol kain samting olsem ol i no save harim tok we ol i save strongim kona bilong ol na tu ol i het strong na bikhet long ol kaunsel.

Ol i tok, mipela i mekim wok bilong mipela long rausim ol dispela manmeri olsem na ol tu i mas harim tok.

Ripot i tok, planti taim ol i save lukim mipela na ronawe na save haitim buai na smok na bihain mipela i go pinis ol i save kam bek na salim ol samting gen.

Narapela ripot i tok wanpela hevi tu i stap long ol het opis bilong Lae Siti Kaunsel olsem strong na pawa bilong ol i nogat bilong wanem planti bilong ol dispela strit maket manmeri em ol wantok tasol na wantok tru bilong ol taun sekyuriti husat ol i save raun long kar bilong wok long sekim ol.

Taim ol i kamap ol i save haitim smok na buai bilong ol olsem ol i no save salim buai na simuk na ol arapela samting tu.

Limitet Preferensel Voting em i niupela wei bilong vot long Nesenel Paliamen lleksen.

Nau yu mas vot long Namba 1, Namba 2 na Namba 3 kendidet yu laikim.



BALLOT PAPER - NATIONAL ELECTIONS
Lincoln Valley Open Electorate


Vot Olsem:

- VOT WANTAIM DISPELA BALOT PEPA NA RAITIM 1, 2 NA 3 LONG BOKS BILONG NAMBA 1, NAMBA 2 NA NAMBA 3 KENDIDET YU LAIKIM.
- RAITIM TASOL 1, 2 NA 3. NOKEN RAITIM OL NARAPELA NAMBA O RAITIM TASOL 1 O RAITIM TASOL 2 NA 3.
- NOKEN PUTIM OL NARAPELA MAK LONG DISPELA PEPA.

2		3
		1

BALLOT PAPER - NATIONAL ELECTIONS
Lincoln Valley Open Electorate

- Raitim 1 long boks bilong Namba 1 kendidet yu laikim.
- Raitim 2 long boks bilong Namba 2 kendidet yu laikim.
- Raitim 3 long boks bilong Namba 3 kendidet yu laikim.



WANTOK
KOMENTRI

Kik bek bilong bagarapim skai

Ples graun i wok long hot nau na i mekim solwara i kirap, bikpela ren i pundaun na kam wantaim strongpela win na i bagarapim planti hap nau. Dispela em ol saveman o saintis i kolim global warming o ples graun i hot nau.

As bilong dispela em bikos planti smok i wok long pulap long klaut nau na brukim karamap we i save stopim ol strongpela lait na hot long kam insait long ples graun.

Ol saintis i bilip olsem dispela i kamap pinis olsem na ol ais i bruk na kamap wara na level bilong solwara i kam antap na ol wara i tait nabaut wantaim bikpela ren na win.

Planti hap bilong Amerika, Esia na Yurop i bungim taim nogut pinis long win na ren na solwara i brukim ples pinis.

Long PNG nau yumi wok long bungim wanpela kain senis yumi no save bungim bipo. Em ples i wok long hot na drai i kamap. Graun i drai na ol kaikai i dai na wara i drai.

Ol i kolim El Nino we i bin kamap long 1997. Nau ol saveman i tok bai kamap gen. Bikpela samting nau em yumi mas kisim gut save long dispela samting.

Ol saveman bilong PNG i mas kamaut klia na tokim ol pipel long wanem samting ol i mas mekim taim dispela drai taim i kamap.

Long ples em yumi gat save long wanem kain samting yumi ken mekim long bus graun bilong yumi taim ples i drai na kaikai i sot.

Tasol kain save olsem em gavman i mas mekim klia long pipel taim hevi i no kamap bikpela yet. Ol ripot i tok sampela hap bilong Sauten Hailans nau em wara i drai na olsem na gavman i mas mekim klia long wanem kain eksen ol pipel i mas mekim long taim kain hevi olsem i kamap.

Ol lain long Weda Opis i mas kam aut klia olgeta de.



JADA 2/9/04

Noken haitim gutpela pasin yumi i gat

Long dispela wik na ol wik bihain bai yumi lukluk long strongim ol gutpela pasin bilong yumi. Olgeta taim long ol niuspepa, redio na televisin planti ol stori nogut i save pairap. Taim ol dispela nius i kamap, yumi hia long Papua Niugini na ol arapela kantri i save ting olsem i no wanpela gutpela samting i kamap long ol komyuniti long kantri bilong yumi.

Tasol taim yumi lukluk raun na glasim gut, planti ol gutpela samting save kamap long ol ples yumi stap long en. Pasin ya yumi karim tu, i no olgeta samting i nogut.

Nau mi laik stori long tripela gutpela pasin sampela lain i soim long las wik. Namba wan stori em dispela. Wanpela meri i save go pas long helpim planti ol manmeri, Tessie Soi bilong 'Tessi Soi Friends Foundation' wantaim sampela ol helpim man bilong em i bin redim 24 kofin bokis. Ol kofin bokis ya bilong 24 pikinini husat bodi bilong ol i stap yet long Pos Mosbi Jenerel Haus Sik mog. Krismas bilong ol dispela pikinini husat i lusim laip em namel long sem taim mama i karim na 7-pela mun. Dispela ol pikinini i nogat wan-



TOK PISIN
wantaim
Peter Maime

pela man o meri i kam long kisim bodi bilong ol na go planim. Ol dispela pikinini nau i ken amamas bikos ol bai malolo long ol gutpela kofin bokis.

I no long taim i go pinis, Tessi Soi wantaim sampela ol wanwok bilong em i bin mekim wankain pasin na planim bodi bilong sampela man na meri husat i bin dai long sik AIDS na stap long Pot Mosbi Jenerel Haus Sik mog.

Namba tu stori em long Mosbi setelmen mi stap long en. Mipela i gat wanpela bikpela pablik toilet wantaim ples bilong waswas bilong ol man na meri. Las wiken, toilet bilong man i blok bikos wanpela man mas tromoi strongpela lip o pema i go long hul bilong toilet. Ples ya i bin blok na pipia bilong ol man i kapsait nambaut long simen floa.

Tasol long Mande dispela wik, ples ausait na insait long dispela pablik toilet i bin klin nogut tru. Taim mi laik go

waswas long moning, mi lukim ples i klin na mi amamas tru. Na mi tingim, husat man tru i klinim dispela ples.

Taim mi waswas i stap, man husat i bin klinim dispela toilet i bin stap namel long ol narapela man husat i go waswas long dispela taim. Dispela man i stori long wok em mekim long klinim toilet i blok.

Em i tok olsem em i yusim han bilong em long rausim, dispela strongpela samting i blokim toilet. Em i stori moa olsem em i no wari long holim pekpek na pispis bikos em i save olsem em bai wasim han bilong em wantaim sop.

Moa long 100 man i save yusim dispela toilet long wanwan de tasol wanpela man tasol i lukim hevi bilong toilet ya na i stretim. Sori poro, mi no save long nem bilong yu. Tasol sapos yumi gat planti kain man olsem yu, ating bai laip i nais tru long setelmen bilong yumi.

Namba tri stori bilong mi i go olsem. Las wik Sarere mi bin go raun long Mosbi Gordons maket na mi kalap long bas namba 4 i go bek long haus. Long Mosbi siti ol bas sevis i gat 25 sita bas tasol.

Mipela i ron i go na long wanpela bas stop, bas ya i bin stop na sampela ol pasindia i bin go aut. Na bihain sampela nupela pasindia i kam gen antap long bas.

Namel long ol dispela gupela pasindia em wanpela pasindia husat i luk olsem bilong kantri Filipins o Korea. Dispela man i ting i gat spes na i kalap tasol olgeta sia i pulap pinis.

Tasol wanpela man Papua husat i sindaun klostu long dua i givim sia bilong em long dispela ovasis man long sindaun na em yet i go sanap long dua.

Poro waitman ya i lapun liklik na taim tura (brata long tok Motu) ya i soim dispela pasin long em, em i amamas tru.

Dispela tripela stori i soim olsem yu laikim ol lain i stap klostu long yu na tu yu laikim yu yet. Wankain pasin yumi olgeta karim tu ya, yumi noken haitim long ol narapela.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Jeremy Burgess

Editor
Yakam Kelo

Published by Jeremy Burgess and printed by Pacific Star-P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea- Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Lida i mas plen bilong God

OL PRINSIPOL BILONG GUTPELA LIDA
wantaim
Pastor na Evangelist
OHARE JABERE

Insait long Lidasip wanpela samting em i stap klia i olsem God i save makim wanwan Lida long kamapim sampela kain wok long helpim ol pipel i go inap long mak we God i laikim.

Taim dispela wok i pinis em wok bilong yu na lidasip bilong yu i pinis. Sapos yu abrusim mak na stap long taim long wanpela Lidasip posisen bai wok bilong yu i no inap kamap gut. Olgeta interes na bel kirap na amamas we yu i gat na ol pipel tu i gat long yu bai inap

long mak bilong em na i pinis olsem.

Mi laik tokim yupela ol Lida manmeri long sampela gutpela ol prinsipol yumi mas bihainim em olsem:

- 51 Lida mas man o meri bilong Prea
- 52 Lida mas ridim tok bilong God (Baibel)
- 53 Lida mas man o meri bilong bilip long God Papa
- 54 Lida mas man o meri bilong harim vois bilong God
- 55 Lida mas wokabaut klostu long God
- 56 Lida mas harim na bihainim tok bilong God
- 57 Lida mas man o meri bilong givim gutpela ofa long God
- 58 Lida mas pret long God long olgeta taim
- 59 Lida mas autim sin bilong em na holim klinpela bel na

strepela pasin

60 Lida mas soim kristen bilip na pasin bilong em ples klia

Eksampol, yumi lukim long histri long Baibel long laip bilong sampela Lida olsem Moses.

Moses, God i makim em long mekim wanpela wok tasol. Dispela wok em long bringim ol pipel i kam aut long Isip long han bilong King Fero i go long graun we ol i ken kaikai gut, malolo gut na lotu long God wanpela tasol.

Mose i bringim ol pipel i kam aut long Isip na bringim ol i kam long Maunten Nipo na em i pinis. God i givim em blessing long mekim dispela wok tasol na i no bilong i go moa. Bikpela wok bilong Moses em long wok wantaim God long bringim ol lain long ples we nau ol i stap i go long nupela

hap. Lida i gat dispela kain wok. Wok bilong kisim ol long ples we nau ol i stap i go insait long nupela hap. Mining bilong dispela kain tok em i bikpela moa insait long olgeta kain level bilong Lidasip.

Yu mas kisim ol pipel long ples we nau ol i stap long bodi, sol o tingting na spirit i go insait long nupela level o ples we ol i painim nupela kain sindaun.

Ecclesiastes 12: 13-14

"Let us hear long conclusion of the whole matter: Fear God, and keep his commandments for this is the whole duty of man.

For God shall bring every work into judgment, with every secret thing whether it be good or whether it be evil."

Nupela rot long helpim ol Palestain

Israel:

OL SEKYURITI gad bilong Israel i was long ol wokman husat i wok long mekim wanpela hap bilong sekyuriti fens long Aida refuji kemp klostu long Bethlehem long Wes Benk. Difens Sief bilong Israel i tok orait pinis long kamapim wanpela nupela rot bilong dispela fens long Wes Benk bihain long wanpela kot bilong Israeli i tok ol i mas surukim sampela hap bilong dispela fens we i wok long pasim we bilong ol manmeri bilong Palestain long dispela hap long go long ol graun bilong ol.


Poto: REUTERS/MAGNUS JOHANSSON



Soldia na polisman pilai, wanpela i dai

GRIS: WANPELA soldia bilong Gris husat i bin sanap was long wanpela hap we ol spot bilong Olimpik Gens i wok long kamap long Athens, i dai bihain long em i bin pilai wanpela gem ol i kolim Rasien Rulet wantaim wanpela polisman. Dispela gem em we tupela man bai putim wanpela katres tasot i go insait long wanwan gan bilong ol. Wanpela bai makim gan bilong em long narapela na sut, sapos dis-

pela wanpela katres i no stap long dispela hul bilong en long paia, orait gan i no inap paia. Orait narapela bai makim na traim sut, sapos katres i no stap long dispela hul bilong en, orait gan i no inap paia. Ol i bai mekim dispela inap, husat i laki, bai katres bilong em stap long hul pas, gan bai paia na na katres bai sutim narapela. Soldia na polisman i wok long pilai dispela gem na soldia i dai. Dispela i bin kamap long fran bilong Olimpik Viles long Metochi Parnithas rijon long Athens. Poto i soim wanpela soldia bilong Gris i mas abrusim wanpela tempol bilong Parthenon. Poto: REUTERS



Paolim ol vot

Venesuela:

OL LIDA bilong oposisen long Venesuela i tok olsem gavman i bin paolim ol vot long helpim Presiden Hugo Chavez long winim sit bilong em gen. Poto i soim ol sapota bilong oposisen i soim kros bilong ol na kukim ol rabis long rot. Poto: REUTERS/France RSCO SPOTORNO

Bikpela ren, rot i bruk

Japan:

WANPELA rot i bruk bihain long graun i bruk long Ookawa taun. Bikpela ren i wok long pundaun long Japan na klostu long 3000 pipel i mas suruk long hap we ol i stap long en. Klostu long 15 pipel i dai long dispela birua pinis.

Poto: REUTERS/KYODO




Rausim ami o bai mipela bagarapim man

Irak:

WANPELA grup bilong Islam i stilim na holim pasim wanpela man Itali long Irak na i givim Rome 48 awa long rausim ol ami bilong en long kantri, nogat bai ol i bagarapim dispela man. Dispela poto i soim ol soldia bilong Itali long Irak.

Poto: REUTERS/CEERWAN AZIZ




Skopien meri

Malaysia:

NUR Malena Hassan, wanpela meri Malaysia, i soim wanpela binatang nogut ol i save kolim Skopien, we em i save stap wantaim long Kuantan, 300 kilomita i go long is bilong kapitel siti Kuala Lumpur. Ol dispela binatang i ol binatang nogut we i gat posin.

Poto: REUTERS/BAZUKI MUHAMMAD



Lukluk i go insait long bikpela bagarap bilong bom

Spain:

JAS husat i wok long lukluk i go insait long birua we i bin kamap long Spain long Mas we ol bom i bin pairap long wanpela tren, i sutim tok long wanpela man Siria na wanpela man Aljeria

long wok bung wantaim wanpela grup bilong ol paitman long kamapim dispela birua: Em i bin mekim dispela tok tok bihain long ol polis i painim pingaprin o mak bilong wanpela kilomita ausait long bikpela tren stesen bilong Madrid.

pela paitman i bin hait long en. Dispela poto i soim ol polis i glasim ol bodi bilong ol manmeri husat i bin dai long dispela birua we i bin kamap wanpela kilomita ausait long bikpela tren stesen bilong Madrid.



Wanbel i no stap

Sudan:


OL TOKTOK bilong kamapim wanbel na bel isi namel long gavman na ol pipel bilong Sudan i no wok long ron gut bihain long ol pipel bilong Khartoum i tok nogat long tingting bilong gavman long ami bilong Afrika bai rausim gan bilong ol pait-

man, husat i wok long makim ol pipel. I gat bikpela kros namel long ol pipel bilong Sudan na gavman bilong en. Long poto sampela manki Sudan i sanap klostu long wanpela haus ol ami i kukim i go daun long Sani Delaiba long saut bilong Darfur rijon. Poto: REUTERS/ANTONY

U.S.A i bagarapim tok-tok wanbel bilong Midel Is - Qurie

Palestain: OL PALESTAIN i tok olsem Yunaited Stets ov Amerika (U.S.A) i bagarapim ol toktok bilong wanbel na bel isi we i wok long kamap long Midel Is. Dispela bagarap i bin kamap taim U.S.A i tok orait long Israel long mekim bikpela moa ol setelmen bilong ol.

"Mi no bilip olsem Amerika i tok nau olsem Israel i ken mekim bikpela moa ol setelmen bilong ol. Dispela i bagarapim toktok wanbel we i wok long kamap," Prait Minista bilong Palestain, Ahmed Quire, husat i stap long poto, i tok. U.S.A i wok long traim long kamapim wanbel na bel isi namel long ol Midel Is kantri olsem Palestain na Israel husat i wok long kros pait



Grup nogut i wok long kilim ol man bilong rot

Brasil:

WANPELA man husat i save raun, slip na kaikai long rot i dai na tripela wankain lain i kism bikpela bagarap long ol man i paitim ol long bikpela siti bilong Brasil, Sao Paulo. Dispela i kism na mba bilong ol kain lain olsem husat i dai long dispela kain we i go antap long 14 insait long foapela de na i gat tingting olsem i gat wanpela grup we i wok long raun, painim na kilim ol dispela kain. Poto i soim Minista bilong Jastis bilong Brasil, Marcio Bastos, husat i mas painim sampela we long stopim dispela hevi.

Poto: REUTERS/SERGIO MORAES



Nupela buk bilong Motlok Ailan

...I mas gat mani helpim long karimaut rises long PNG

PLANTI toktok i save kamap insait long kantri na ausait long naispela, gutpela na narakain kalsa na pasin tumbuna Papua Niugini i gat we i winim planti arapela kantri long wol.

Yumi save pinis olsem PNG em i dispela kantri long wol we i gat moa long 800 tokples, ol karkain kalsa na tumbuna pasin. Tasol planti long ol kalsa na pasin, ol stori, ol tumbuna stori, ol singsing, ol rot bilong mekim ol hankraf olsem kaving na ol arapela samting i sut long kalsa na tumbuna pasin em ol i skruim i go long wanpela jeneresen i go long narapela long toktok tasol. Na ol i no raitim long buk. Olsem na i gat pret olsem sapos ol lapun i dai, ol planti tumbuna samting bai i lus tu.

Em i bikpela samting long raitim ol stori na ol arapela tumbuna pasin na kalsa bilong yumi long ol lain i kam bihain i ken save long en.

Tasol i no planti lain i save go insait long wok bilong raitim kamap ol samting bilong tumbuna na kalsa. Wanwan tasol.

PNG Institut ov PNG Stadis em wanpela hap gavman bodi we i wok long karimaut ol rises long ol musik, ol stori na ol arapela tumbuna na pasin kastom bilong PNG. Na em i kamapim pinis sampela buk.

Tupela wik i go pinis, Musik Dipatmen bilong Institut ov PNG Stadis i bin lonsim wanpela nupela buk gen. Dispela em namba tu buk institut i lonsim long ol nupela buk i gat stori long ol singsing bilong ol asples lain. Na dispela em bihain long ol saveman ol i kolim long antropolojis i karimaut wok rises na raitim ol stori bilong wanpela grup pipel.

Nupela buk institut i bin lonsim long Ogas 13 em ol i kolim long *Nakkai Taku's Musical Fables* we Profesa Richard Moyles, em wanpela antropolojis bilong Nu Silan, i bin raitim. Institut aninit long Apwitihi Siris we Institut i bin statim 14 krismas i go pinis, dispela am i buk namba 7.

Nupela buk i gat ol stori na singsing bilong ol pipel bilong Motlok Ailan insait long Not Solomons (o Bogenvil) provins. Dispela em ol liklik ailan i stap longwe long bikpela solwara bilong Bogenvil. Narapela tupela susa ailan grup bilong en (Taku o Motlok) em long Nuguria o Fead na Nukumanu o Tasman Ailan. Ol dispela tripela ailan grup i stap longwe long wanpela arapela long bikpela solwara tasol ol i gat wankain tokples, kalsa na pasin tumbuna na rot long wokim ol samting. Ol pipel bilong tripela ailan grup em ol i kolim long "Polinesien Autlaia" bilong wanem ol i



Dokta Moyle i prisenim wanpela buk i go long tupela bikmeri bilong Motlok Ailan husat i tokim em ol stori we em i bin raitim long buk. Nem bilong tupela em Tuhea Nunua na Loea Pasia. Lonsing bilong buk i bin kamap long Pot Mosbi.

hap bilong Polinesia grup.

Profesa Moyle i bin karimaut rises long ol kastom, tokples, ol stori na pasin kastom bilong ol Motlok pipel insait long 10-pela krismas. Em i bin statim stadi bilong em long yia 1994 na buk bilong em ol bin lonsim long Pot Mosbi las mun tasol.

Ol pipel long Motlok Ailan i holim pas yet long ol pasin tumbuna bilong ol. Bikos ol i stap longwe na em i hat long ol narapela lain na grup i go insait long kamapim ol bikpela senis long ples, pipel na rot ol i save stap na mekim ol samting long en. Long 1960 inap long 1980, nogat misinari i save go long kirapim lotu long ol ailan bilong wanem ol sief bilong ol i bin putim tambu long ol misinari i go long ol ples bilong ol. Ol 15 sotpela stori na singsing ol i kolim long Kkai em sampela long ol we Profesa Moyle i bungim insait long dispela nupela buk i soim naispela kalsa we ol Motlok pipel i holim strong yet long en.

Don Niles em bosman na Sinia Etnomusiolojis (O saveman bilong ol wok stadi long ol musik bilong ol asples pipel) wantaim Musik Dipatmen bilong Institut ov PNG Stadis, na em i tok olsem long stat yet long yia 1994, ol sief o ariki na pipel bilong Motlok i bin givim tok orait na sapos i go long Profesa Moyle long karimaut rises wok long ol pasin kastom, ol singsing na tokples bilong ol.

Ol sief na pipel yet i bin askim Dokta Moyle long raitim buk long ol kastom pasin, singsing na stori na ol lain bilong ol i stap ausait long ailan na ol dispela bai kam bihain i ken save.

Mista Niles i tok em i amamas olsem dipatmen bilong em i bin helpim long kamapim dispela buk we ol Taku pipel bai kisim gutpela samting long en wantaim tu ol arapela pipel insait long PNG.

Mista Niles i tok tu olsem lons bilong buk i kam bihain tasol long selebresen bilong Nesenel Buk Wik. Na dispela em i kontribusen i go long ol buk bilong PNG stret we i gat ol stori bilong ol tumbuna na singsing long tupela tokples. Em long Tok Inglis na Tok Pisin.

Mista Niles i tokaut tu olsem lons bilong dispela nupela buk long wanpela lukluk bilong em i amamasim 30 krismas bilong institut. Na wanpela bikpela wok we institut i save mekim long ol bipo yia em long kamapim ol wok long ol tokples. Em ol buk i gat ol stori na ol singsing bilong ples we ol pipel i ken ritim na kisim save long en.

Tasol Mista Niles i tok em i amamas olsem dispela buk ol i lonsim bai helpim tru wok bilong bungim, tanim na skruim wok long ol tokples stret.

Tasol long karimaut ol wok rises na raitim buk olsem Profesa Moyles na institut i wokim, i mas gat mani. Na mak long mani we institut i save go daun long olgeta yia, em i tok.

Mista Niles i tok institut i laki long painim mani long peim pawa na telipon bil.

Tasol em i tok i nogat mani long karimaut ol rises wok na prinim tu.

"Dispela em i no samting bilong sem long en tasol em i bikpela samting bilong sem stret long en," Mista Niles i tok.

Em i tok long prinim dispela buk, ol i askim planti lain long helpim wantaim mani tasol ol i no kisim wanpela gutpela bekim.

Em i tok tru, olgeta lain i save tok PNG i gat ol naispela kalsa tasol stori i narakain long givim helpim mani long karimaut ol rises o dokumen wok long ol.

Na em i tok ol dona kantri i mas save olsem long lukautim ol kastom na tumbuna pasin i makim ol wanwan

ples em i narakain kontribusen bilong PNG long wol. Na em i bikpela samting long givim sapos, olsem tasol em i bikpela long bildim rot, helt senta na ol arapela bikpela samting moa.

Mista Niles i tok bikos nogat lain i bin helpim Profesa Moyle, em i yusim mani we Yunivesiti ov Oklen i bin givim long karimaut narapela rises bilong em.

Em i tok moa olsem planti ausait lain i save kam long PNG long karimaut ol wok rises tasol wanwan taim, yumi save harim nius tasol sapos sampela samting long wok rises i go rong.

Tasol Profesa Moyle em i gutpela piksa long wanpela man i karimaut rises na maski ol kain hevi i kamap, em i sanap strong na pinisim wok. Insait long 15 krismas em i wokim rises ya, em i save go na kam long Nu Silan, PNG na Motlok. Em i kamap olsem gutpela pren tru bilong ol Motlok pipel na sampela bilong ol i save i go i kam long lukim em long Nu Silan, Mista Niles i tok.

"Long em i raitim kamap dispela buk bihainim askim bilong ol Taku pipel yet na saposim long prinim i soim long ples klia gutpela wok bilong em na luksave long ol pipel bilong Taku," Mista Niles i tok.

Profesa Moyles em i holim wok olsem Asosiet Profesa long Musik na tu Dairekta bilong Akaiv long Maoti na Pasifik Musik. Em i namba tu bos long Antropoloji long Yunivesiti bilong Oklen long Nu Silan. Em i karimaut ol rises tu long planti hap bilong Pasifik olsem Samoa, Tonga na Australia. Em i raitim 15 buk pinis long musik bilong ol kantri long Pasifik rijon, moa yet long ol Polinesia kantri.

Wantaim gutpela save na wok long kalsa na tokples long ol Polinesia pipel bilong Samoa na Tonga, em i bin raitman long karimaut rises wok long Taku o Motlok Ailan we ol pipel em ol i lain wantok bilong ol Polinesia.

Tupela meri husat i bin givim bikpela helpim long kamapim buk i bin stap tu long buk lons. Em Loea Pasia na Tuhea Nunua. Ol Motlok komyuniti i bin givim gutpela sapos na ol bin putim kamap ol naispela tumbuna singsing na danis bilong ol long amamasim lons bilong buk.

Veronica Hatutasi i ripot long wanpela buk we i stori long pasin tumbuna bilong ol pipel bilong Motlok na man husat i bin raitim dispela buk.



Ol man Motlok i wokim danis bilong ol long lonsing bilong buk. Ol foto: DON NILES

Longtaim pablik seven kisim luksave

Dispela em stori bilong Sepa Leke, wanpela man husat i save wok hat olgeta de long moa long 50 yia long helpim long kamapim Papua Niugini.

Andrew Molen i raitim

FAIVPELA yia moa na em bai wok olsem pablik seven aninit long Dipatmen bilong Helt inap 50 yia olgeta we ol lain bilong pilai kriket bai nap tok "hap sensi."

Nogat planti manmeri inap wok hat long taim tru olsem, tasol yumi mas tingim olsem developmen bilong kantri na ol gutpela sevis i go long ol pipel bilong yumi em i bikpela samting.

Dispela em stori bilong Sepa Leke, wanpela man husat i wok long taim tru wantaim gavman olsem wanpela helt opisa, na bihain long em i wok abrusim 45 yia olgeta, gavman i luksave long hatwok bilong em na Kwin bilong Englan i makim em long Kwin's Bon De long dispela yia long kisim Britis Empaia Medol (BEM) long wok bilong em insait long pablik sevis.

"Mi laik tok tenkyu i go long Kwin, gavman, famili, ol poro na komyniti blong mi long dispela awod na mi amamas tasol long sevim kantri na ol pipel bilong mi," Mista Leke i tok.


Komyuniti na ol famili bilong em i amamas long em i kisim luksave na ol i tok tenkyu i go long Kwin na gavman tasol ol i tok mak bilong awod ya i daun-bilo tumas long givim kain man olsem Mista Leke long ol sevis bilong em. Ol i tok em i lapun pinis na em bai no inap stap narapela 10-pela yia long wetim narapela bikpela awod gen.

Ol i tok ol i wet long taim long lukim sapos Dipatmen bilong Helt bai luksave long hatwok bilong em na makim em i go long Nesenel Ekeskyutiv Kaunsel (NEC) long givim nem bilong em long wanpela awod i kam long Kwin tasol nogat.

"Mipela wet i go na inap pinis olsem na mipela yet i rait na askim gavman long luksave long em.

"Ating sapos mipela i no bin raitim pas bai ol i no inap luksave long em," Tanora Simoi Sepa, wanpela pikinini man bilong Mista Leke i tok.

Sapos gavman i makim em long kisim wanpela awod antap liklik olsem Oda ov Britis Empaia (OBE) o Komanda ov Britis Empaia (CBE) bai orait liklik bilong wanem em i wok long taim tru na wokim planti bikpela wok na



Mista Leke i lukluk long maikroskop na i katim natnat long rausim binatang bilong sik malaria i save stap insait na skul long en long Maprik long 1958.

nau em i wok yet," wanpela long taim poro bilong Mista Leke, Camillus Ongogo i tok.

Mista Leke, husat papa bilong em bilong Kairuku long Sentral provins na mama bilong Daru long Westen provins na Hanuabada long Sentral provins i bin stat wok olsem helt opisa long 1956 taim wanpela Dokta Todd i bin kisim em long wokim medikel trening bilong em wantaim Ela Beach Haus Sik long Pot Mosbi taim em i pinis long Sogeri Hai Skul.

Long 1957 em i go long malaria kontrol skul long Minj, Westen Hailans provins, we em i kamap malaria kontrol opisa na taim em i pinis long hap wantaim setifiket ol i salim em i go long Maprik long Sepik distrik.

"Dispela taim i bin nogat Is na Wes Sepik, em i bin Sepik distrik tasol," Mista Leke i tingim bek na i tok.

Taim mi stap long Sepik mi save raun long planti ol liklik ples long hap na wokim wok bilong mi tasol bes bilong mi stap long Maprik, em i tok.

Sampela ol ples na sab distrik Mista Leké i bin go raun wok en em, Ambunti, Angoram, Wewak, Aitape, Dreikir, Nuku na Wutung long Vanimo. Em i save go long ol dispela ples long painim na bungim natnat (moskito) i save karim sik malaria na katim ol long skul long ol. Mista Leke i tok em i bin namba wan man Papua Niugini long katim dispela natnat na rausim mauswara bilong en long painim ol binatang i save stap insait na kamapim sik malaria.

"Natnat em i liklik tru na ol binatang insait i liklik moa yet na bai yu no i nap lukim long ai nating, mi yusim masin ol i kolim daisekting maikroskop long katim natnat na rausim mauswara bilong en.

"Mi lapun pinis nau tasol mi ken wokim dispela wok yet sapos ol i laikim mi long wokim. Ol i painim tasol ol rait samting bilong wokim dispela wok olsem rait masin na natnat na bai mi wokim," em i tok.

Long Janueri 1960 gavman bilong Australia i bin kisim oksileri divisen opisa sistem i kam insait long PNG na ol wokman bilong helt na edukesen husat krismas bilong ol i antap liklik i bin gat sans long aplai long dispela posisen. Mista Leke i bin wanpela bilong ol lain husat i bin wokim entri tes long Madang distrik.

"Mipela i aplai long Febueri na ol i kisim mipela faivpela long go na toktok wantaim ol na kisim medikel tes long Madang distrik. Bihain ol tokim mi olsem mi pas," Mista Leke i tok.

Long Epril long wankain yia em i kisim wanpela setifikesen kad i kam long Gavana Jenerel bilong Austalia long dispela taim, Sir Paul Hasluck.

"Dispela kad i mekim mi na ol narapela husat i kisim dispela kad olsem

wanpela oksileri divisen opisa bilong pablik sevis bilong Australia.

"Gavman bilong Australia i luksave long mipela na pe bilong mipela i save kam long Kanbera," Mista Leke i tok.

Tasol Mista Leke i bin lusim kad bilong em taim em i go raun wok long ol Niugini Ailans.

"Mi go painim long Nesenel Akais tasol i no stap," em i tok.

Mista Leke i tok gavman bilong Australia i bin salim sampela mani i kam bihain long Independens bilong PNG long baim ol lain olsem em husat ol i bin stap olsem oksileri divisen opisa aninit long pablik sevis bilong Australia tasol ol i no bin lukim dispela mani.


"Dispela em i tru, mi bin ritim long niuspepa bilong gavman," em i tok.

Long pinis bilong 1960 em i go long ol Niugini Ailans we em i save wokim sevei long blut bilong ol manmeri, painim na katim ol natnat long stadi long ol na spreim marasin long ol ailan bilong Jaol, Lawangai, Tarbar, Musau, Lihir, Anin, Tanga, Laimbom na Is na Wes Nu Briten provins. Mista Leke i bin go long Nissan Ailan na ol narapela ples long Bogenvil tu na i bin stap tu olsem tisa long malaria kontrol skul long Nonga.

Long stat bilong Bogenvil Kraisis long 1983, gavman i askim sampela wokman long voluntia long ritrens long helpim kantri long sevim sampela mani na Mista Leke i wanpela bilong ol lain i putim han bilong em i go antap long ritrens.

Long 1987 Dokta R. Taufu i kisim em i go bek long wok olsem Disis kontrol opisa bilong Nesenel Kapitel Distrik (NCD).

Em i wok long hap olsem i kam inap em i pinis long Jun 1999, tasol long Novemba long wankain yia Dr John Bana Koiri long Pot Mosbi Jenerel Haus Sik na Dokta James Wangi, Dairekta bilong Disis Kontrol brens, i bin kisim em i go bek olsem kodineta bilong TB/DOTS bilong NCD wok we em i mekim yet nau.



Mista Leke olsem em i stap nau. Foto: ANDREW MOLEN



Laikim Penpren

Nem: Bridgette Korievi
 Krismas: 17(meri)
 Adres: Mercy Secondary School, PO Box 580, Wewak, East Sepik Province
 Save laikim: Slip, go long lotu na pilai ol spot.

Nem: Oie Eleanor Lantu'e
 Krismas: 17(meri)
 Adres: Mercy Secondary School, POBox 580, Wewak, East Sepik Province
 Save laikim: Harim musik, pilai basketbol, soka na volibol, ridim buk na save laikim raitim pas long ol pren.

Nem: Nick Seba
 Krismas: 17(man)
 Adres: Dagie Setelment, Madang Block, PO Box 299, Kimbe, West New Britain Province
 Save laikim: FIai gita, painim ol abus, pilai soka, amamas long stori wantaim ol niupela pren, skelim musik, na wokim pren wantaim ol arapela manmeri bilong narapela provins.

Nem: Anut Waindu
 Krismas: 17(man)
 Adres: Dagie Setelmen Madang Block, POBox 299, Kimbe, West New Britain Province
 Save laikim: Skelim musik, wokim gaden, pilai soka, na raitim pas long penpren.

Nem: Sally Amy Newman
 Krismas: 28(meri)
 Adres: Box CT 841, Oquaa City, Ghana, West Africa
 Save laikim: Skul, ol kainkain bilas, ridim buk na kukim kaikai.

Nem: Branda Saunduo
 Krismas: 18(meri)
 Adres: POBox 3555, Lae, Morobe Province
 Save laikim: FIai volibol, ridim buk, wokim vanilla na raitim pas long penpren.

Nem: Pauline Saun
 Krismas: 20(meri)
 Adres: POBox 3555, Lae, Morobe Province
 Save laikim: FIai volibol, lukim TV, wok gaden na rait long penpren.

Nem: Jacinta Bari
 Krismas: 19(meri)
 Adres: POBox 3555, Lae, Morobe Province
 Save laikim: FIai volibol, soka, lukim TV, wokim saksak, mekim gaden na raitim pas long penpren.

Nem: Manuel Wisep
 Krismas: 18(man)
 Adres: POBox 3555, Lae, Morobe Province
 Save laikim: FIai gita, volibol, raitim pas long penpren na lukim NRL long TV.

Nem: Casmel Surning
 Krismas: 19(man)
 Adres: POBox 3555, Lae, Morobe Province
 Save laikim: Stadi long haus, lukim NRL long TV na raitim pas.



STORI TUMBUNA

LONG bipo tru long wanpela ples Tuwate long Lumi Distrik insait long Sandaun provins i gat ol yangpela meri tasol i stap. Wanpela gutpela santaim, ol yangpela meri i go painim ol pis long wara Sangu. Ci i go na tupela susa i go ol yet na ol narapela ol i go bilong ol yet. Crai tupela susa i go kism planti pis stret na tupela i laik painim mambu long pulumapim wara. Tupela i katim wanpela mambu na insait. Na long dispel long dispela mambu, wanpela lapun man i stap insait. Tupela i katim dispela mambu na taim mambu i bruk ol i lukim wanpela bebi i krai i stap. Tupela susa wantaim i laikim bebi stret olsem na tupela i karim bebi i go long ples. Long nait ol i laik slip, ol i putim dispela bebi long namel long tupela na ol slip. Taim tupela i slip indai dispela bebi i tanim kamap lapun kela kukim man stret. Taim em laik susu em bai kaikaim susu bilong tupela na tu em save kirap, em i pinisim olgeta kaikai long haus. Bihain em i tanim bebi gen na slip namel long tupela

Lapun kela i trikim tupela susa



susa ya. Moning ol save kirap na painim kaikai i stap. Ci i save paol long husat i save kam long nait na pinisim kaikai bilong ol. Olgeta taim em save mekim olsem na trangu tupela yangpela meri save kism taim stret long susu bilong tupela. Nau tupela susa i pasim tok na wanpela nait, tupela i giaman slip na opimai liklik tasol naluk-

luk i stap. I no long taim bebi bilong tupela ya i tanim kamap bikman na i gat kela tu. Em kirap kaikaim olgeta kaikai long haus na bihain kam tanim bebi na slip. Tupela nau i plenim long kilim dispela giaman bebi. Em nau traipela ren i pundaun na dispela wara Sangu tait i no isi. Tupela susa i tokim bebi olsem bai ol i go putim umben

long wara Sangu. Crai liklik susa i karim bebi na bikpela susa i karim fishing net na ol wokabaut i go long sait bilong wara. Liklik susa ya i giaman wel na pundaun na tromoi dispela bebi go daun long wara tait ya na tait i karim em i go. Em dispela bebi i tanim kamap lapun man nau na em i singaut na tokim tupela susa olsem 'mi no laik kaikaim tupela.

Na bilong wanem mi isi long tupela' Em i orait, yu kaikaim olgeta susu na planti sua i kamap. Tupela susa i amamas na i go long ples na olgeta meri amamas na singsing.

MATHEWE BOREX LUM SANDAUNPROVINS

Mi laik senisim pasin bilong dring... Inap Laiplain i helpim mi?

Dia Laiplain
 LONG potnait bilong mi, ol wantok i singautim mi long go wantaim ol long hotel.
 Ci i tok long mipela bai dring sampela bia na bihain bai mipela i go long haus piksa.
 Tasol bihain long ol i dring sampela bia pinis, nogat wanpela long ol i laik go lukim muvi.
 Nogat. Sampela taim, ol i stap dring inap hotel i pas.
 Na sampela taim, ol bai go long haus bilong narapela poroman na skruim dring i go. Osem wariem na mi ken stretim dispela wari bilong mi?
 Mi pret sapos mi no go dring wantaim ol, bai mi lusim ol pren bilong mi.



Em i gutpela samtign long mekim ol samtign long helpim ol pren. Tasol em i no gutpela samtign sapos sapos yumi mas mekim rong o pasin i nogut bilong amamasim ol pren. Sri tumas, i gat planti pipel tumas long PNG i lus long strongpela dring. Tasol sori moayet long ol dispela pipel i dring long mekim ol pren i hepi. Yu tok olsem olgeta wanwok i save go long hotel. Em i tru? Ating i gat planti olsem yu husat i no laik go tasol i nogat strong long tok nogat. Planti taim, wanpela o tupela lida tasol i save pulim ol man na

ol i go. Na i no long laik bilong ol. Yet. Nogat. Ating sampela woklain bilong yu tu i laik go lukim muvi. Wanwan man i ting olsem olgeta man i laik go dring. I nogat man i gat strong long sanap na tok narakain. Nogat. ol pren i no laik harim dispela kain tok. Wanpela we long abrusim dispela kain tok em long hiayu yet i sanap toktok strong olsem wanpela lida. Long neks potnait, yu sanap na yu toktok strong olsem. "Maski long go long hotel tunait. Mi laik go lukim piksa. Husat i laik go wantaim mi." Ating bai yu lukim planti pren bilong yu bai go poromanim yu. Tasol sapos nogat wanpela i laik go wantaim yu, maski, yu go yu yet. Maski ol i lap. Bihain lonfg sampela de, yu ken gris wantaim ol long gutpela muvi yu bin lukim na yu bin amamas tru.

Neks taim, ating tupela o tripela i laik go wantaim yu na traim... Na sapos yu traim traim na i nogat wanpela man i laik go poromanim yu, orait, maski. Yu tingting nau... Tingting gut. Ating moabeta yu painim sampela pren i laik long woksop bilong yu, orait, yu go joinim sampela grup long YC o long sios o long spot klab. Sapos yu stap insait pinis long wanpela olsem na ol wanwok i singautim yu gen long go long hotel, yu ken tokim ol olsem. "Sori pren, mi noken. Ci pren bilong mi long hap sait i wetim mi." Mi noken promisisim yu, bai yu no lusim sampela pren na wanwok. Tasol maski... sapos ol taim ol i pulim yu long mekim ol kain samtign yu no laik mekim, moabeta yu painim sampela arapela kain pren. Gutpela pren i save helpim yu.

M Laiplain



Kanage dring spak long kawas klap na lukim wanpela meri i sindaun em yet na dring bia i stap.

Ai bilong Kanage i lok long meri ya na em i go baim tupela botol na wokabout i kam klostu long meri ya na givim wanpela botol long em na tok.

Rait meri mi lukim stail bilong yu long dring bia i nais tru winim ol spak man ya. Yu dring wantaim sens ya.

Ol man ya dring olsem bus kanaka ya. Na meri ya askim Kanage, yu yet olsem wanem, yu orait o nogat?. Na Kanage tok, mi orait tasol lika i no wok yet.

Ol lain sindaun klostu i harim na dai stret long lap long tok bilong Kanage.

**Masta Wai
Renbo
Mosbi**

Kanage bilong Morobe long hap bilong Kande Kulung stret. Bikipela miting bilong makim kendidet bilong nesanel ileksen na ol pipel i bung long sekim husat em gutpela lida bilong ples long ol i sanapim.

I no longtaim ol i singautim birua man bilong Kanage stret i go antap long fran. Em tu i laik sanap resis long ileksen. Kanage lukim na ai op na kirap nogut wantaim.

Em nau ol i askim ol kendidet long toktok long wanem samting ol i laik mekim long bringim developmen na sevis long i kam long ples.

Taim bikman ya i tok, mi bai bringim helt, edukesen, komyunikesen, infrastraksa na arapela sevis moa. Kanage harim i go na ia bilong em i pen na em bikmaus.

Wanem kain skul bilong yu long kamap memba. Yu fit long planim taro long ples ya. Mi winim yu liklik long skul ya. Mi em fom 2 na yu em stended 6 ya. Nolidis bilong yu pulap long botol tasol. Noken westim sit bilong ol pipel bilong Finsafen.

Raun wantaim Kanage olgeta wik

**Tom Ton
Lae**

Kanage i go holide long ples long hap bilong Banz.

Ol boi long ples i kam sikan na stori wantaim em. Kanage stori long laip long Mosbi na ol stail em i save mekim long wiken raun long disko ples long Erima.

Taim em i stori wanpela boi long ples i wok long harim na tok, em nais ya rait olgeta ya.

Kanage pilim swit long stori taim boi ya i tok olsem na em stori olsem em wanpela top mangi bilong brukim lewa bilong ol meri Erima ya. Mi em Elvis ya. Olgeta meri save lewa bruk long mi ya.

Olgeta provins em mi raunim pinis tasol mi wari yet long meri Banz ya. Olsem na mi kam sekim raun long asples ya.

Wanpela boi kirap na tok, hei yu gat planti pinis ya, lusim bilong mipela ol boi Erima i kam eksens wantaim mipela long Banz em bai fea ya. Kanage tok, yupela baim wan wei balus tiket na bai mi karim i go bek na ol bai kam wan wei long yu ya, nating tru ya.

Ol mangi Banz kisim strongpela filings tru long kon stori bilong Kanage na ol tok, taim Kanage laik go bek long Mosbi ol bai baim balus tiket na go sekin na kam bek. Mauswara bilong Kanage em moa yet na nau em i wantet long Banz i stap.

**John Konz
Hagen**

Kanage em draiva bilong minista na em i save ekting olsem wanpela biksot politisen taim em toktok long ol manmeri. Wanpela taim em go wantaim minista long wanpela miting na em sanap long sait bilong minista taim minista i wok long toktok. Taim minista i toktok bai Kanage i bikmaus long sait olsem, em stret, that's rait. Em wok long mekim olsem olgeta taim i go na em ting em kempen long ileksen na em bikmaus long sait. For good gavman, isi sevis and fri everything. Bihain long miting i pinis minista tanim na tokim Kanage, draiva tasol em abrusim

mi long politiks ya. Ating bai mi nominetim yu long jenerel ileksen. Kanage harim na tok, betim wining hos, em bai kam hom ya. Olgeta lain long kar i dai long lap na ol i ron i go long haus.

**Kiso Kots
Manus**

Kanage i lukim piksa

bilong ol man i pilai soka na kaikai drai bisket long hap taim na em tingting planti olsem wanem na i nogat koka kola o kol wara long kolim nek wantaim.

Tingting bilong Kanage i wok i stap na em i kisim wanpela tingting long bihainim ol dispela lain soka tim long kaikai bisket bilong ol. Olsem na wan-

pela wiken em i karim tipot wantaim kap na go long soka fil na wetim dispela soka tim i save kamap long piksa long ol i mas kam na pilai. Dispela soka tim i bin kamap na pilai na Kanage stat long boillim ti wantaim ol kap pepa na katen long sait na wetim hap taim bai ol boi i kam aut long kisim win. Long hap taim

Kanage karim kap ti na ron i go long hap ol boi i kam sindaun na kisim win. Taim kosa i toktok long ol boi long hap taim Kanage i ting bai ol i kaikai bisket long bihain olsem na em redim kap ti bilong em na sindaun gut i stap. Taim ol boi i redi long go bek pilai na Kanage i no lukim wanpela bisket na em askim wanpela sagi

boi olsem, hei pukpuk, bisket we, ti ya mi karim i kam ya. Mangi sagi i lukim na tokim Kanage, yu stap we las wik. Kanage karim kap ti na wokabout isi i go na singaut, em orait, nogat bisket bai yupela lus nogut tru.

**Peter Kawas
Boroko**



National Fisheries Authority

Pablik Toksave

HAP BILONG LAE SITI OL I MAKIM BILONG WOKIM FISH PROCESSING PLANT NA OL SAMTING GAVMAN BILONG PIPELS RIPABLIK OV SAINA BAI WOKIM KLOSTU LONG DISPELA PROJEK.

Menesa bilong National Fisheries Authority Sylvester Pokajam i tokaut olsem hap bilong Lae siti ol i makim bilong wokim fisheries processing bisnis long nambis aninit long wanbel (MOU) ol i sainim long Desemba 2003 namel long PNG gavman na gavman bilong Pipels Ripablik ov Saina.

Em i tok dispela projek bai kamap na ol bai givim i go long gavman bilong PNG olsem presen i kam long PRC. Dispela em eid grent projek namel long tupela kantri we Diaptmen bilong National Planning na Rural Development i stap insait long mekim i kamap. NFA bai go pas long karimaut ol wok bilong mekim projek ya i kamap.

Mista Pokajam i tok ol i makim Lae bihain long ol saveman bilong Saina i karimaut ol wok stadi long wanem hap bilong sanapim dispela projek. Ol lain i stap wantaim tu em ol opisa bilong NFA, Diaptmen bilong National Planning na Rural Development na Industrial Centres Development Corporation. Grup i bin raun long Madang, Lae na Rabaul long 16-24 Ogas 2004 long lukim wanem hap i orait long sanapim dispela projek. Ol i bin bung wantaim ol provinsel gavman na toktok wantaim ol lokol fising kampani long ol kainkain wok we i stap insait long dispela projek. Ol i lukluk tu insait long ol kain bikipela samting olsem rot, wof, ples balus, wara saplai, pawa, graun, ol samting bilong wokim bilding na ol saplai na arapela samting moa we dispela projek i mas yusim long kamap.

Disisen i bin kamap bihain taim Saina i laik wokim projek long graun bilong gavman. Graun i bin bikipela samting ol i lukluk long en taim ol i kamap wantaim dispela disisen. Narapela bikipela samting tu em long wof we sip bai i kam na go long en.

Gavman bilong Saina i makim olpela Lae Yacht Club olsem hap bilong wokim dispela projek we bai i gat 50 ton wan de tuna loining plant, 15 ton wan de blast frisa, 220 ton wan de kol stores na 10 ton wan de long wokim ais. Dispela hap graun em bilong NFA na

bai i go long wokim dispela projek. Asian Development Bank (ADB) tu bai wokim long lain wof long dispela hap long givim sevis long loining plant. Taim ol i pinisim dispela projek bai ol i givim dispela bisnis i go long praivet bisnis long ranim. Dispela em wankain long Kavieng na Manus we ol fis kampani i kisim lis long gavman wof na fis projek long hap.


Long tok tenkyu long Gavman bilong Saina long givim dispela projek, Mr Pokajam i askim ol provinsel gavman na ol papagraun long oraitim ol graun we i stap nating long ol kain ekonomik developmen olsem long kamap. Em i tok planti ovasis bisnis o investa i save bungim hevi long painim graun bilong mekim wok. NFA i laki long holim taitel long sampela hap graun we wok developmen i wok long kamap nau long en na bai lis i go long ol bisnis.

Em i tok ol investa i save pilim gutpela long putim bisnis bilong ol antap long graun bilong gavman na i no long ol graun bilong ol ples lain. Em i tok sapos ol pipel i laik kisim helpim bilong ekonomik developmen orait ol i mas mekim ol graun i redi long developmen i kamap long ol.


Gavman bilong Saina bai redim disain kontrak na givim i go long husat praivet bisnis i winim kontrak long Septemba. Bai ol i kisim olsem 4-pela mun long putim ol risos wantaim (fainens na ol wokman) pas-taim long konstraksen bilong projek i stat.

Ol i ting olsem bai ol i statim dispela projek long namel bilong yia 2005.


Tenkyu


**Sylvester Pokajam
Managing Director**

30th August 2004



PAPUA NEW GUINEA



NATIONAL LITERACY WEEK

6 - 10 September 2004



"Educate a girl and educate a family"

Literacy Promotes Equality

Kisim Save Stretim Sindaun

Diba Tahua ese Metau ia Koua



National Literacy & Awareness Secretariat, Department of Education
P O Box 446 Waigani NCD, Papua New Guinea
Phone: (675) 324 6416, 324 6423, 324 6400 Facsimile: (675) 325 5902
Email: nlaspng@yahoo.com, Website: www.nlaspng.org



Bot bisnis em bikpela bisnis



• Bot bisnis long ol nambis ples insait long kantri em i bikpela tru. Na tu hevi bilong mani i save mekim planti manmeri long ples i ron long bot i go long ol taun long salim kaikai o raun lukim ples. Ples olsem Vunamarita long Is Nu Briten i nogat bris na ol pasindia bilong Rabaul Queen i kalap long dispela tagbot bihain long ol i ken go antap long sip.

Planti mani PNG i mekim i no helpim pipel

PLANTI ovasis mani we kantri i mekim long salim ol kago na ol samting long ovasis i no helpim laip na sindaun bilong ol pipel bilong Papua Niugini, Gavana bilong Milen Be, Tim Neville, i tok.

Mista Neville i tok Minista bilong Treseri, Bart Philemon, i toktok olsem kantri i gat planti risev mani nau wantaim Benk bilong Papua Niugini (BPNG).

Tasol ol dispela planti ovasis mani kantri i mekim ino helpim laip na sindaun bilong ol pipel, em i tok.

Mista Neville i tok

kain toktok bilong gavman long tok olsem kantri i mekim planti mani long ovasis mani i kam long kantri em long tokim ol pipel olsem kantri i ron gut.

Tasol dispela ovasis mani (foren risev), i no mekim wanpela samting long bikpela hat taim ol pipel bilong PNG i stap long en tude. Olsem na olgeta toktok bilong gavman long gutpela wok bilong em i no tru olgeta.

Em i tok mak bilong mani o risev kantri i gat tude i liklik tru long mak bilong mani kantri i bin gat wantaim Benk ov

PNG (BPNG) long 1996 na 1997 taim yumi skelim wantaim strong bilong Amerika dola.

Olsem na Fainens Minista i noken mekim ol bikpela toktok nabaut we i no tru long helpim ol pipel bilong PNG, Mista Neville i tok.

Olsem na long makim Oposisen, mi askim gavman long hariap mekim samting stret long daunim bikpela kos bilong ol kaikai na ol samting we i wok long givim bikpela pen na hevi long ol pipel bilong PNG, em i tok.

Sampela stua i no helpim kantri - Neville


GAVANA bilong Milen Be provins, Tim Neville, i askim gavman long glasim gut ol wok bilong olgeta Saina stua insait long kantri.

Mista Neville i tok em i nogat bel nogut long ol Saina tasol em i lukim olsem ol bisnis bilong ol Saina i no helpim kantri long ol trening bilong ol wok manmeri na redim ol long holim ol wok we ol waitman i holim tude. Dispela em ol samting we lo bilong kantri i tok long ol ovasis bisnis i mas mekim.

Mista Neville i tok ol i mekim bikpela mani tru wantaim kainkain prais bilong ol kaikai na ol kago long stua tasol ol dispela win mani bilong ol i no helpim PNG.

Em i tok ol dispela bikpela mani ol i save mekim long baim liklik takis na sasim bikpela prais i save go we. Ol pipel bilong mipela i save tromoi mani long bisnis bilong ol hia long kantri bilong mipela yet tasol mipela i no lukim wanpela gutpela helpim i go long ol pipel husat i strongim bisnis bilong ol insait long dispela kantri.

Olsem na Mista Neville i askim gavman long lukluk insait na stopim pasin we ol lain ya i wok long makim ol kainkain prais bilong ol yet long ol kago na ol samting ol i save salim long stua



• Wanpela wokmeri long wanpela bilong ol dispela kain stua Mista Neville i no wanbel long en i salim wanpela samting long wanpela kastoma.

bilong ol.

Dispela tu i soim olsem ol gavman opisa bilong Intenel Revenu Komisn (IRC) o takis opis i wok

Mista Neville i askim tu Minista bilong Leba na Emploimen long lukim olsem olgeta bisnis i bihainim lo bilong gavman.


long helpim ol na i no kisim wanpela bikpela lukluk i go insait o

mekimsave long kain pasin olsem. Olsem na mi askim Minista bilong Fainens long lukluk insait long dispela na mekim-save long ol lain i wok insait long strongim dispela krangki pasin, Mista Neville i tok.

Mista Neville i askim tu Minista bilong Leba na Emploimen long lukim olsem olgeta bisnis i bihainim lo bilong gavman long givim trening long ol wokmanmeri na sapotim ol long go antap na kisim ol posisen bilong ol ovasis lain.

Wanem asua o krangki pasin i mas gat wok painimaut i go insait na stretim, em i tok.

Tolukuma Slip Sore



Dispela foto i soim kemp sait o hap we ol manmeri husat i save wok long Tolukuma Go! Main long Sentral provins i save stap. Ron long helikopta long Pot Mosbi i go long hap bai kisim 30 minit, wankain taim tasol olsem long ron long kemp sait i go long Popondetta, we i stap baksait tasol long ol dispela mauntain long foto. Foto: PNGBD.COM



BANK OF PAPUA NEW GUINEA

INCREASE IN TREASURY BILLS MINIMUM BID

THE BANK OF PAPUA NEW GUINEA WISHES TO ADVISE THE PUBLIC THAT THE MINIMUM BID AT THE TREASURY BILL AUCTION WILL BE INCREASED FROM K100,000.00 TO K500,000.00 EFFECTIVE AS OF TUESDAY 31ST AUGUST 2004.

INVESTORS ARE ADVISED THAT TREASURY BILLS ARE ALSO AVAILABLE FOR PURCHASE IN THE SECONDARY MARKET THROUGH OTHER LICENSED FINANCIAL INSTITUTIONS AND BROKERS.

L. WILSON KAMIT, CBE
GOVERNOR



MINISTRI BILONG PETROLIUM NA ENEJI

PABLIK STETMEN LONG GES

KOMESELAISESEN NA PAITIM

TOKTOK LONG OL PROJEK



Sir Moi Avei KBE, MP

Nau em i taim bilong mi long bekim ol wari bilong pablik long komeselaisesen o wok bisnis bilong ol Ges Projek i no go het, na long bekim man husat i raitim wanpela pas aninit long het tok "Promised Gas bubble becoming a disaster dream" (We i bin kamap insait long View Point bilong Post-Courier niuspepa long Mande 23 Ogas 2004).

Dispela man husat i raitim dispela pas i no klia long netserel ges indastri, o wok bilong Gavman long givim sapot long sait bilong wok politiks na polisi bilong kamapim developmen bilong ol bikpela netserel risos olsem ges.

Long bekim ol paol toktok na tingting we i nogat gutpela as long en bilong dispela man husat i raitim "promised gas bubble becoming a distant dream," mi laik tokaut gen long bilip bilong mi olsem bai i gat sampela bikpela ges projek i go het long mekim na salim ges ol i mekim insait long PNG yet long tri inap long 5-pela yia bihain.

Husat manmeri i klia long bipo stori bilong wok bisnis bilong ges i save olsem em i wok we i save kamap long longpela taim bipo long ol ges projek i save kirap gut. Sampela ges projek inap stap moa long 20 yia bipo em i stat long mekim na salim ges.

Ol stekholda, wantaim ol papagraun mipela "i no giaman-im ol" bilong wanem mipela i save tokaut long olgeta paitim toktok i kamap long ol ges projek. Em i wok bilong gutpela gavman long toksave long kantri na tu ol papagraun bilong ol risos long wok gavman i mekim long ol paitim toktok mi save mekim wantaim ol bisnis i gat tingting long invest o putim mani long kamapim developmen wantaim gutpela na bikpela hap ges risos bilong PNG.

Nogat wanpela investa husat i wok long paitim toktok wantaim gavman i stap bai i laik putim mani insait long PNG bilong wanem ol yet i mas skelim strong bilong wok bisnis bilong ol na glasim wanem hap bilong putim mani bilong ol na long wanem taim tru, tasol Gavman i mas wok hat long pulim ai bilong ol investa i kam long PNG.

Driman na bikpela as tingting long yusim ges long "kik statim" developmen insait long indastri, wantaim daunstrim prosesing long ol kain kain netserel risos mipela i gat bilong wanem em i wanpela bikpela sans mipela i noken abrusim. Em i no "driman nating" o wanpela "tok win tasol". Mipela inap na mipela i mas skelim dispela bikpela hap eneji o pawa bilong ges bilong mipela bilong indastri, na ol jenerel risos developmen projek na yusim ges bilong givim pawa na kamapim ol bai-projek developmen.

Gavman i kamapim pinis sampela wok glasim long soim klia ol kain kain samting mipela inap yusim ges long en insait long PNG. Mipela i ken yusim insait long haus, long draim ol kes krop o ol arapela agrikalisa samting bilong salim, kamapim wok daunstrim prosesing bilong ol netserel risos, ol indastri wok, long ol bikpela woksap bilong mekim ol kain kain strongpela marasin na long ol bikpela risos developmen projek olsem Porgera Main we i save yusim ges i kam long bikpela Hides ges fil.

Nau yet domestik maket bilong PNG inap yusim tasol 7,000 tan LPG long wanpela yia. I gat bikpela hap ges i stap yet inap long 14 trilien kubik fit ges na mi ges yet i stap inapim 40 trilien kubik fit we inap long salim i go long ol maket long ovasis inap taim we ol indastri projek i sanap strong insait long PNG. Long opim domestik maket o maket insait yet long PNG, ol petroleum kampani i mas bihainim lo long kamapim na salim ges i go long ol manmeri insait long kantri, wantaim ol bikpela indastri projek tu taim ol i sanap strong insait long PNG.

Pablik i mas klia olsem strongpela maket sekyuriti tasol inap long sapotim o strongim wok bilong stretim na salim ges. Ges i no olsem wel, we ol inap salim long ol spot maket, nogat. Ges em ol i save salim aninit long ol long

taim kontrak. As bilong dispela em i mas i gat bikpela hap mani o invesmen. Dispela hap mani ol i save kaunim long ol bilien dola na i mas i stap long sanapim ol fektori samting long kamapim, karim na salim ol hap volum ges we bai inap long kisim bek win mani o profit.

Teknikol o stia toktok i kam long ol Gavman opisa i tok klia olsem i gat inap ges insait long PNG long sanapim Ges Paipain i go long Australia Projek (GTA) na tu wanpela Likwit Nesenel Ges Projek (LNG) insait long PNG yet. Indastri na Gavman i bihainim LNG Projek bai ol i salim ges i go long Esia, tasol bikpela hevi bilong mani long Esia long 1997 na 1998 i mekim hat tru long ol kantri long putim mani long PNG LNG Projek.

Long 1996 inap nau, indastri na Gavman i wok bung long Ges Paipain i go long Australia Projek tu.

I gat planti kantri i laik baim LNG long intanesenel maket, olsem na ol i mas paitim toktok long ol kontrak wantaim ol kastoma, na dispela i no liklik wok. Hat wok tru.

Samting olsem 7 o 8 yia i lus long karim GTA projek i kam long dispela mak em i stap nau, we em i redi long Fran En Enjiniering na Disain (FEED) bai go het bihain long wanpela moa bikpela kastoma i sainim. Dispela bai kamap pastaim long dispela yia i pas.

Dispela bai wanpela bikpela wok bilong PNG ges indastri na Nesenel Gavman insait long wol. GTA bai wanpela long ol longpela paipain we i winim olgeta arapela paipain long wol na samting olsem 7-pela yia tasol i lus na nau mipela i karim i go inap long FEED mak we i winim ol arapela wankain projek we i save long taim long kamapim.

Nau bai mi toksave long komyuniti long sampela ges wok bisnis na ol projek.

- Olgeta kibung na paitim toktok wantaim ol bisnis bilong Japan i lukluk tasol long Japan bai givim hap mani gavman i mas givim olsem Stet Ekwiti insait long Ges tu Australia Paipain Projek. Wanpela MOU i stap wantaim Itochu Koperesen long helpim long givim mani long GTA, na paitim toktok i go het yet. Mitsubishi Heavy Industris na Oil Search i wok long karimaut wanpela fisabiliti stadi long kamapim wanpela methanol projek bilong PNG.

- I bin i gat paitim toktok wantaim Petronas na Ranhill bilong Malaysia. Petronas i no toksave long ol wok bisnis bilong em insait long PNG yet bilong wanem ol i wok bung wantaim AGL bilong Australia long sanapim paipain long sait bilong Australia aninit long dispela projek. Ranhill i bin i gat tingting long putim mani bilong Stet Ekwiti long Ges tu Australia Paipain Projek na givim teknikol stia toktok long Projek. Ol gavman opisa i wok long glasim proposel o pepa long wok bisnis bilong ol i stap.

- Sampela kibung i bin kamap namel long gavman na ol kampani bilong Pipels Ripablik Ov Saina, dispela China Nesenel Petroleum Kampani (CNPC). Ol opisa bilong CNPC i bi kam long PNG na karimaut ol teknikol toktok na mekim ol lukluk raun tasol CNPC i no givim wanpela strongpela tingting yet long putim mani insait long PNG.

- Wanpela proposel o askim i kam long Niugini Gas and Chemicals, wanpela join vensa bisnis namel long ol kampani bilong Amerika, Indonesia na Korea. Dispela askim em bilong sanapim wanpela meten ges kompleks long Wewak wantaim wanpela paipain i go antap long ol ges fil long Hallans. Sampela long ol kampani insait long dispela join vensa i kisim pinis

ol eksploresen o wok painim laisens long painim ges long Noten sait bilong PNG, wantaim driman long painim na mekim ges we bai ol i ken stretim long dispela meten ges kompleks.

- Oil Search i wok long paitim toktok wantaim ENERSEA bilong Amerika na ol arapela kampani bilong eksportim o salim Kompres Netserel Ges (CNG) i go long New Zealand. Askim o maket bilong ges long New Zealand bai i go antap bilong wanem Maul ges fil long hap i wok long go daun na i no inap long strongim ges bisnis.

- Wanpela wok bung wantaim i kamap wantaim ol petroleum kampani husat i gat bikpela bisnis insait long PNG o ol kampani husat i redi long sapotim ol bikpela as tingting bilong nesenel developmen. Gavman bai givim bikpela halivim i go long ol join vensa bisnis i kamap namel long ol dispela kampani.

Bungim olgeta dispela samting, em i klia olsem em ol bikpela projek we i mas gat bikpela paitim toktok we mi yet, ol arapela minista na opisa na ol bikpela stek holda bilong ges indastri bilong mipela i mas mekim.

Ministri na Dipatmen bilong Petroleum na Eneji i gat strongpela tingting bihain long ol i kisim ol gutpela toktok i kam long ol kain kain manmeri bilong PNG na long ovasis tu. Planti manmeri i laikim Ges i go long Australia Projek i mas kamap hariap long strongim ikononi, na ol i tokim mipela long gat billip na wok hat i go inap projek i kamap. Ol arapela i tokaut olsem ol i laik lukim moa long wanpela ges projek i kamap bai ges wok bisnis polisi bilong mipela i ken strongim ikononi i go inap long taim bihain.


PNG Petroleum Indastri na Nesenel Gavman i ken kamapim ol dispela projek mi toktok long en pinis wantaim ol arapela ges bisnis projek tu. Em samting mipela i mas mekim long strongim prais bilong ol netserel ges risos. Sapos mipela i lusim i stap insait long graun, bai i no inap karim karkai bilong kantri. Olgeta dispela projek bai karim karkai bilong olgeta stekholda, ol papagraun na ol provin-sel gavman.

Ol dispela projek i no inap na i noken karim karkai bilong wan wan manmeri, kampani o grup. Karkai bilong ol em bilong pipel bilong Papua Niugini tete na long taim bihain.

Ol longpela na bikpela paitim toktok na longpela taim bilong sanapim ol ges projek i no soim olsem petroleum indastri o Gavman i nogat save o i no mekim wok o i laik daunim wok developmen bilong kantri. Dispela em i pasin bilong ges komeselaisesen bisnis we i save wok wantaim planti bilien dola olsem na olgeta wan wan bisnis i wok long glasim ol hevi ol i mas karim pastaim long ol i givim mani i go long ol ges projek.


Mi luksave long kros bilong planti manmeri bilong wanem i gat ol longpela hap taim we wok i no go het long ol ges projek we indastri na gavman yet i laik kamapim. Tasol long wankain taim, gavman i laikim pablik long luksave olsem ol ges projek i save kamap sampela yia bihain, na olgeta liklik hevi long nesenel developmen em ol i mas glasim bai ol i ken luksave long ol bikpela karkai bilong mipela olgeta, na ol pikinini husat bai kamap long bihain taim insait long Papua Niugini.

HON. SIR MOI AVEI KBE, MP
MINISTA BILONG PETROLIUM NA ENEJI
NA EKTING MINISTA BILONG NESENEL PLENING NA RUREL DEVELOPMEN



**Oi eksen
poto
bilang
wiken**

[Faint, illegible text at the bottom of the page, likely a photo credit or description.]




**Strong bilong ol tim i sanap olsem
bihain long pilai bilong ol long Raun 25**

Ol namba wan tim bilong
brukim difens bilong arapela tim

Ol tim we difens bilong
ol i winim ol arapela tim

- Bulldogs
- Roosters
- Storm
- Panthers
- Dragons



- Roosters
- Dragons
- Bulldogs
- Broncos
- Storm



Ol Top Trai Skora bihain long Raun 25

- Amos Roberts (Penrith) - 22
- Matt Cooper (Dragons) - 17
- Scott Donald (Sea Eagles) - 17
- Ryan Cross (Roosters) - 16
- Karmichael Hunt (Broncos) - 15
- Willie Tonga (Bulldogs) - 15

- Anthony Minichiello (Roosters) - 14
- Matt King (Storm) - 14
- Reece Simmonds (Dragons) - 14
- Brett Stewart (Sea Eagles) - 13
- Jamaal Lolesii (Bulldogs) - 13
- Husat bai gat moa neks wik?

Fainels wik stat neks wik

NAMBA wan wik bilong ol fainels bai stat long Fraide Septemba 10 i go inap long 12.

Nau i gat wanpela raun tasol i stap long bikpela resis long dispela wiken we ol 8 tim bai pait hat long stap insait long top 8.

Top 8-pela tim long lata bai go insait long fainels wik. Olgeta arapela 7-pela tim bai i mas wetim neks yia nau bilong traim gen.

Long top 4 nau long lata, Roosters na Bulldogs bai traim pilai long posisen 1 na 2. Brisbane Broncos i sindaun long namba trip posisen, na maskim ol i win o lus, ol bai holim yet namba tri posisen. Namba 4 posisen i gat tupela tim i resis long en,

Panthers i sindaun long 32 poin na Dragons i sindaun long 30. Dispela wiken, Panthers bai bungim Broncos. Sapos Panthers i win, ol bai holim namba 4 posisen. Dragons bai malolo, tasol sapos Storm, husat i sindaun long namba 6 i winim gem bilong ol, ol bai inap long brusim Dragons na go senisim ol long namba 5 posisen.

Long ol arapela tim long top 8, Dragons bai sindaun yet long namba 5 o 6, Cowboys bai holim namba 7 posisen na Wests Tigers, Canberra Raiders na Sharks bai brukim bun long winim namba 8 posisen.

Tripela tim wantaim i sindaun long 24 poin, na olgeta

bai pilai strong. Tigers bai bungim Sharks na Raiders bai bungim Rabbitohs. Raiders i mas win wantaim bikpela poin sapos ol i laik stap long namba 8. Long pilai namel long Tigers na Sharks, tupela wantaim bai pilai strong long traim na stap insait long top 8.

Wuden spun bai go long Rabbitohs o Warriors. Nau yet Souths i sindaun long las posisen, tasol Warriors husat i sindaun long namba 14 posisen i stap long wankain poin. Sapos Souths i laik abrusim wuden spun, ol i mas skorim planti trai tru long abrusim Warriors. Warriors bai bungim Bulldogs, na i no luk olsem ol inap long daunim ol.

Raiders bai tok gutbai long tupela biknem pilaia

LONG las pela gem bilong ol long dispela wiken, Canberra Raiders bai pilai strong long tok gutbai gut long tupela bikman bilong ol, Ruben Wiki na Luke Davico.

Wiki na Davico wantaim bai go pilai wantaim ol ovasis klab neks yia.

Long Sarere nait tu bai ol i mas pilai strong long traim gat sans long stap insait

long top 8 na pilai insait long fainels.

Wiki i stap wantaim Raiders inap 12 yia olgeta na long Sarere nait, em bai makim namba 224 fes gred pilai bilong em makim Grin Masin.

Davico i stap 11-pela yia na pilai 176 gem. Long Sarere nait, ol pilaia bilong em bai ron raunim fil wanpela taim long luksave long pilai

bilong em wantaim Raiders.

Bihain long gem long Sarere nait, tupela bai ron raunim fil long tok tenkyu na gutbai long ol sapota bilong ol.

Raiders i mas winim las gem bilong ol wantaim bikpela skoa long gat sans long pilai insait long fainels.

Sapos ol Raiders i no win na Sharks na Tigers i lus, bai ol i

mas sekim long poin difrensel o lukim hamas poin i stap namel long olgeta gem bilong ol na makim namba 8 posisen long wanpela long ol tasol.

Na Tigers i go pas long tripela long sait bilong poin.

Sapos tupela arapela tim i no skorim planti trai, Tigers bai go long fainels wik 1 we bai i gat planti strongpela gem tru we bai kamp.

Ol Top Poin Skora bihain long raun 25

Pilaia	Tim	Poins
Hazem El Mazri	Bulldogs	270
Josh Hannay	Cowboys	192
Brett Hodgson	Tigers	188
Andrew Walker	Sea Eagles	176
Michael De Vere	Broncos	162
Amos Roberts	Panthers	152
Kurt Gidley	Knights	136
Matt Orford	Storm	136
Luke Burt	Eels	134
Craig Fitzgibbon	Dragons	120

Tallis bai hangamapim but

BIKPELA paia lait fowet long Brisbane husat i save karim dispela nem 'Raging Bull', Gorden Tallis bilong ol Brisbane Broncos nau i redi long hangamapim but bilong em na lusim Ragbi Lig.

Tallis i pasim tingting na mekim dispela bihain long em i kisim tupela bikpela bagarap long bun long bak-sait bilong em.

Em i tokaut long dispela wik olsem dispela ragbi lig sisen long NRL bai las wan bilong em na em bai hangamapim but nau bihain long em i pilai 211 ragbi lig gem insait long NRL. 157 long ol dispela gem em i pilai wantaim Brisbane Broncos.

I bin i gat planti tok win i bin raun olsem Tallis bai lusim lig, tasol nau Tallis yet i tokaut.

Em i bin karim hevi long nek bilong em na pilai long dispela sisen, na nau em i pilim olsem em i noken traim i go moa yet nogut em i kisim bagarap.



Tallis.

Na nau em i lukim olsem Brisbane i sainim pinis kontrak long kisim bek bikman Brad Thorn bilong neks yia na ol yanpela fowet i kam antap long A gred sait bilong Brisbane, Tom Learoyd na Sam Thaiday, na em i skelim olsem em inap lusim lig.

Las gem Tallis bai pilai long hom graun bilong ol Broncos em long namba wan wik bilong fainels.

Long Fraide nait long dispela wik em bai go pas long ol yangpela bilong Brisbane taim ol i bungim ol primia bilong las yia Penrith Panthers.

Broncos i wok long mekim trening i stap, tasol planti long ol i karim ol liklik hevi bilong bodi na ol i no trening strong.

Bai kosa Wayne Bennet i mas glasim gut na toksave long strong bilong planti ol top pilaia bilong tim i kisim bagarap na stap olsem Darren Lockyer (bun bilong banis), Shane Webcke (masol long lek), Brent Tate (skru bilong fut), Tonie Carroll (sol), Shaun Berrigan (sol), Craig Frawley (skru bilong fut), Scott Minto (nek) na Dane Carlaw (hevi long het bilong em).

Fittler laikim maina primiasip

YUPELA, em i no kisim inap yet? Kepten bilong Sydney City Roosters, Brad Fittler i tokaut olsem em i wok long guria liklik long ol las pilai bilong em wantaim NRL.

Na em bai amamas tru sapos wanpela driman bilong em long las yia yet long winim maina primiasip bai inap karim kaikai.

"Mipela yet mipela i makim strong bilong mipela. Mipela i makim wanem samting mipela i laikim, bilong winim maina primiasip bihain long gren fainel long las yia," Fittler i tok.

"Mipela i gat planti gutpela pilaia na gutpela lain ap olsem na mipela i save olsem mipela inap long winim. Mipela i pilai inap long mak bilong kisim olsem na mipela bai kisim. Ol man i tokim mi olsem sapos mipela i lus na kam seken, mipela bai pilai seken semi fainel gem long hom graun bilong mipela, tasol sapos mipela makim driman bilong mipela na mipela i no kisim, em bai no inap gutpela."

Dispela wiken em i las raun long sisen propa na bihain long en bai fainels i stap.

Nau yet ol i resis wantaim Canterbury Bulldogs long winim maina primiasip.

Long samting olsem 23 yia, ol Roosters i no winim wanpela maina primiasip. Nau ol i laik kisim taim ol i bungim Parramatta



Fittler.

Eels long Aussie Stadium long Sande.


"Em bai gutpela tru sapos mipela i winim dispela resis, bihain mipela traim strong long fainels," Roosters kosa Ricky Stuart i tok.

Stuart i tok sapos ol i winim maina primiasip, ol bai inap malolo gut pastaim long gren fainel.

Fittler yet i tok olsem em i wari liklik long lusim ragbi lig, tasol em i tok lig bai no inap stap wantaim em olgeta taim long laip.

Tasol wan pilaia bilong em, Luke Ricketson i tok ol i gat sampela nupela fowet na ol bai pilai strong long winim gem bilong Fittler.

"Mipela i toktok i stap long traim mekim dispela yia i gutpela tru bilong Fittler," Ricketson i tok.



Em Tim Bilong Mi

Raun 26 NRL Dro

Fraide, Septemba 3
7.30 pm. Penrith Football Stadium

Penrith Panthers V **Brisbane Broncos**

*Lukim dispela gem long EMTV long hap pas 8 long Fraide nait.

Sarere, Septemba 4
5.30pm. Energy Australia Stadium

Newcastle Knights V **West's Tigers**

NQ Cowboys V **Cronulla Sharks**

Canberra Raiders V **Sydney Rabbitohs**

Sande, Septemba 5
2.00pm. Ericsson Stadium

New Zealand NZ Warriors V **Canterbury Bulldogs**

Manly Sea Eagles V **Melbourne Storm**

Sydney City Roosters V **Parramatta Eels**

*Lukim dispela pilai long 4 kilok long apinun long EMTV.

Malolo: St George Dragons

Elliot kisim bek ol olupela pilaia long opim rot long fainels

KOSA bilong Canberra Raiders, Matthew Elliot i lukluk long ol olupela pilaia bilong Raiders long karim ol i go long fainels long las gem bilong ol long dispela wiken egensim South Sydney.

Senta Adam Mogg, winga Phil Graham, lok Tyran Smith na seken rowa Ruben Wiki bai staim gem long Sarere nait.

Narapela tupela pilaia i kam bek em fowet Michael Hodgson na winga Nathan Smith i sindaun long bens.

Mogg (sol), Graham (skru long fut) na Hodgson (bagarap long waitlewa) i kam bek long ol bagarap bilong bodi bilong ol na tupela


Smith i kam bek long saspensen. Sapos ol i laik stap insait long fainels, Raiders i mas daunim Souths na Newcastle i mas daunim Wests Tigers.

"Mipela i mas lukluk strong long dispela pilai na mipela i mas lukluk tu long gem namel long Cronulla na Cowboys," Elliot i tok.

Sapos Sharks i win na Tigers i lus, Raiders i mas daunim Souths wantaim moa poin na winim mak bilong poin bilong Cronulla egensim Cowboys.

Elliot i tokaut olsem em i luksave olsem Souths bai traim abrusim wuden spun na ol pilai strong tru.

Broncos na Souths brukim bun long dro



Jeff Sutton bilong Souths i traim ronawe long Gorden Tallis.

ATING Brisbane Broncos i les pinis long pilai i go long golden poin taim.

Las wiken ol i dro wantaim South Sydney Rabbitohs 34-34.

Na Souths i traim long daunim Brisbane bilong wanem long 15 yia olgeta, ol i no inap long daunim Broncos.

Tasol bihain long 90 minit, skoa i no bruk na i stap wankain tasol.

"Mi bin amamas stret long pilai bilong ol boi bilong mi," Kosa bilong Souths Arthur Kitinas i tok. "Mi lukim olsem ol pilai gut tru long nait.

11-pilaia bilong Broncos i no bin pilai long bagarap tasol ol i bin ronawe long Rabbitohs tupela taim long gem bilong ol tasol ol i no pinisim gut Souths.

Souths tu i bin gat sans long winim gem, tasol ol i no bin inap.

Taim Souths i kisim lid na skoa i sanap long 35-28, hap bek bilong ol Joe Williams i bin kikim wanpela gutpela fil gol, tasol em i paitim gol pos na abrus.

Wanpela minit bihain Brisbane i go daun long sait bilong Souths na Neville Costigan i skoa na Corey Parker i kikim gol.

Kitinas i tok olsem ating sapos dispela fil gol i bin go insait, ol bai inap long winim gem, tasol nogat.

Dispela lus i lukim Souths i sindaun long wuden spun posisen yet.

Kosa bilong Broncos, Wayne Bennett i belhat yet long dispela golden poin rul.

"Mi no amamas. Mipela i no pilai strong, na ol i pilai gut," Bennett i tok.

Em i tok nau ol i sindaun tasol na wetim ol fainels bilong stat, tasol bikpela hevi bilong ol asua long bodi i stap yet wantaim planti biknem pilaia bilong ol.

Long Rabbitohs sait, tupela olupela pilaia bilong Brisbane i bin kirapim das.

Lok Ashley Harrison na huka Shane Walker i bin pilai strong tru egensim olupela klab bilong ol.

Cowboys amamas long namba wan fainels

EM i taim bilong pati nau long North Queensland.

Cowboys, wanpela klab i stap 10-pela yia pinis na ol sapota i wok long klostu givap nau, i kisim ples pinis long pilai insait long fainels bihain long ol i daunim Wests Tigers las wiken.

Maski ol i lus egensim Sharks long Sarere, ol bai pinis long namba 7 posisen yet.

"Em i histori bilong ol dispela man na klab tu," kosa Graham Murray i tok.

Em i tok dispela em i bikpela samting bilong planti long ol sapota bilong Cowboys tu.

"Tray (kepten Travis Norton) na mi yet i wok long makim maus bilong North Queensland tasol. Mipela pilai long stretim laik bilong ol dispela manmeri tasol. Em i bikpela samting tumas na mipela i mas amamas bilong wanem ol pipel bilong North Queensland i save sapotim mipela gut tru," Murray i tok.

Las taim Cowboys i bin pinis gut long wanpela sisen em long 2002 na 2003. Na taim ol i pilai egensim Tigers las



Ol Cowboys i amamasim win na namba wan fainels bilong ol las wiken.

wiken, ol i guria liklik taim Tigers i opim skoa bod 6-nil.

Tasol North Queensland i bin strong na long hap taim ol i kisim bek lid 10-6.

Long seken hap, ol i ron raunim ol Tigers na skoa i go antap moa long 22-6 taim winga Ty Williams i resis 70 mita long skorim trai na Matt Bowen i putim wanpela bilong em yet tripela minit bihain.

Kepten Norton i tok olsem dispela em i bin bikpela amamas tru long ol pilaia, sapota na olgeta lain husat i sapotim ol long taim bipo i kam inap tete.

"Olgeta boi i amamas long mekim semi fainel long namba wan taim long histori bilong klab," Norton i tok.

West's Tigers tu em narapela klab husat i no pilai long fainels yet. Nau ol i resis long namba 8 posisen i stap.

Kosa bilong Tigers, Tim Sheens i tok olsem ol boi bilong em i bin mekim planti asua tumas na Cowboys i winim gem.

Nau em i tok olsem ol boi bilong em i tren strong i stap na lukluk long traim makim namba wan fainels bilong ol tu.

Poin Lata bilong NRL bihain long Raun 25

Namba	Klab	P	W	D	L	B	PF	PA	PTS
1	Roosters	23	18	0	5	2	662	358	40
2	Bulldogs	23	18	0	5	2	706	481	40
3	Broncos	23	16	1	6	2	582	487	37
4	Panthers	23	14	0	9	2	626	547	32
5	Dragons	24	14	0	10	1	624	415	30
6	Storm	23	13	0	10	2	656	487	30
7	Cowboys	23	11	1	11	2	490	494	27
8	West's Tigers	23	10	0	13	2	493	508	24
9	Raiders	23	10	0	13	2	492	591	24
10	Sharks	23	10	0	13	2	508	609	24
11	Eels	23	9	0	14	2	507	578	22
12	Knights	23	9	0	14	2	490	601	22
13	Sea Eagles	23	8	0	15	2	585	726	20
14	Warriors	23	6	0	17	2	417	639	16
15	Rabbitohs	23	5	2	16	2	433	750	16

P: Pilai, W: Win, D: Dro, L: Lus, B: Bye o malolo, PF: Poin Fo, PA: Poin Agens, PTS: Poin

Lukim neks wik long moa NRL stori na poto

PNGRFL laik kamapim na strongim ragbi lig

PAPUA Niugini Ragbi Futbol (PNGRFL) Developmen Plen bai ronim ol kosing, edministresen na trening kos, bai ronim Anda 11, 13 na 15 kompetisen long ol skul na kirapim Ekedemi bilong Lig. Na bai kisim helpim long Australia Ragbi Lig (ARL).

Dispela ripot em Peter Bevan bilong Australia husat i mekim wanpela wok painimaut long sampela taim namel long dispela yia we i lukim olsem PNGRFL i gat bikpela nid long ARL i mas givim helpim long kamapim na strongim ragbi lig long kantri.

Bevan em i wanpela konsalten wantaim Melbourne Storm Ragbi Lig Klub long Australia we em i save mekim wok painimaut long we bilong developim spot we dispela i save kisim ol wok bilong edministresen, kosa, teknikal na ol yangpela long skul. Australia Ragbi Lig wantaim tingting bilong helpim PNG Ragbi Futbol Lig bihainim askim bilong ol i kisim Bevan long kantri long kamap wantaim ol samting we em i save PNGRFL i sot long en. Hia em ol tingting bilong Bevan.

Dispela em i namba wan hap:

Developmen

Nau yet ragbi lig i stap olsem tasol. I nogat bikpela samting i kamap long en, long strongim na kamapim tingting bilong ol man long pilai long en. I nogat ol fultaim developmen opisa husat i wok wantaim PNGRFL long Anda 17 na Anda 19 kompetisen we dispela i wanpela askim bilong PNGRFL long ol wanwan afiliat lig long ronim insait long kompetisen. Na long dispela Anda 17 na Anda 19 i save stap long olgeta afiliat lig.

Kain save na strong em ol pilai i soim long sinia level i kirapim tingting long wanem maski i nogat wanpela gutpela program bilong ol man o manki long lain na pilai ragbi taim ol i yangpela yet ol i ken pilai gut long sinia level. Level we ol pilai i ken pilai tru tru long kompetisen em long 16.

Dipatmen bilong Edukesen long



Marcus Bai. Man Papua Niugini stret husat i mekim nem long pilai ragbi lig bipo long Australia na nau i pilai long Ingran supa lig kompetisen.

PNG i stopim olgeta strongpela pilai we i ken bagarapim bodi hariap long taim bilong skul. I bin i gat wanpela bung i kamap wantaim Seketeri bilong Edukesen, Peter Baki, husat i amamas long dispela tingting bilong lukim ol skul manki i pilai ragbi lig na i amamas long harim ol profesenol opisa tasol i ronim dispela program long ol skul. Wantaim dispela laik i tingting olsem bai i mas i gat wokbung wantaim Dipatmen bilong Edukesen na ol PNGRFL o ARL opisa long ronim Anda 11, 13 na 15 level kompetisen. Na dispela program bai kamap long pinis bilong ol

skul de o long ol Sarere moning.

Oi Tingting (Rekomendesen)

Wanpela tingting bilong kamapim developmen program em PNGRFL na ARL bai i mas kamapim na dispela program em bai ol opisa bai kamapim long Australia. Dispela program em tupela bai givim long Papua Niugini Spot Komisn husat bai kisim na givim long Dipatmen bilong Edukesen. Na olsem dispela program bilong statim non-kontek skill program long ol sekenderi skul i mas stat long 2005.

Tasol pastaim long dispela program i go het sampela man i mas kisim trening olsem ragbi lig o spot developmen opisa bipo long ol i givim dispela program.

Toksave

Bikpela hevi long we i pasim dispela tingting long kamap gut em i nogat wanpela tren man husat i ken wok olsem developmen opisa long PNG. Mi lukim olsem i gat tupela o tripela man tasol long PNG husat i ken go het na givim dispela program. Tasol i gat nid yet long trenim moa man long kamap olsem developmen opisa. Dispela opisa bai i mas kisim helpim long ARL.

Kamapim Ragbi Lig Ekedemi

Tingting na plen bilong kamapim Ragbi Lig Ekedemi bai helpim tru baset bilong helpim PNGRFL long i go long \$50,000 (K120,000) tasol dispela i ken i go antap moa sapot sampela ol arapela man o bisnis haus i givim helpim.

Nau yet opis bilong PNGRFL i stap long Nesenel Spot Institut (NSI).

Tingting em long painim 20 ol gutpela manki husat krismas bilong ol i

stap long 15 i go antap long 20 we ol bai go long ekedemi long taim bilong skul holide tripela taim long yia we ol bai go insait long trening, kisim skul bilong nutrisen, rot bilong abrusim birua o bagarap long bodi, tritmen na narapela ol samting. (Na dispela hap em ol bai tren long en em NSI bai givim.)

Long tupela namba wan yia, ol opisa bilong ARL bai go pas long en we ol kodinetim bai givim long ol kosa bilong PNGRFL long mekim wok.

Sampela developmen long junia ragbi lig kompetisen


I gat pinis Skulboi Ragbi Lig kompetisen long Nesenel Kapitel Distrik (NCD).

Man husat i go pas long dispela kompetisen em bipo PNG Kumul pilai Iffysoe Segeyaro. Dispela kompetisen em i ron aninit long Pot Mosbi Ragbi Lig (PRL) na i kisim luksave bilong PNGRFL na Dipatmen bilong Edukesen.

Tasol dispela i no min olsem kompetisen i kamap long laik bilong PNGRFL. Nogat. Tasol em i gutpela tingting we i gat bilip PNGRFL i gat laik long kamapim tu tasol i sot long ol opisa long ronim na sot long mani tu. Segeyaro i statim dispela kompetisen bipo long Bevan i kam long kantri.

Skulboi Ragbi Lig kompetisen i stat pinis na nau ol skul olsem Laloki Hai Skul, Kila Kila Hai Skul, Nupela Erima Praimeri Skul, Ororo Praimeri Skul, Holi Rosari Praimeri, Pari, Kaugere Praimeri Skul, Gordons Intanesenel Skul, Bambi, Badihagwa Hai Skul na Hagara Praimeri Skul i stap long kompetisen. Ol pilai i kamap long Pot Mosbi Ragbi Lig graun 1 na 2 na i gat tingting tu long holim sampela pilai long Sir John Guise Stadium.

Spot ripota Paul Zuvani i rait long tingting bilong Peter Bevan long divelopim na strongim ragbi long na kirapim ragbi lig ekedemi



Iffysoe Segeyaro. Man husat i gat laik long wok wantaim ol skul na ol manki long divelopim ragbi lig long junia level. Sapos plan-ti manmeri i gat kain tingting olsem kantri bai i gat gutpela ol spot manmeri.


LAE
BISCUIT




WANTOK

Spots

LAE
BISCUIT



DikaToua



Mae Koime



Mowen Boino



Ryan Pini

Gavman bai welkamim PNG Olimpik Tim tumoro long Tiket Tep Pered. Pered bai stat long opis bilong Papua Niugini Spot Federesen long 11:30 moning na go long Wards Rot, tanim i go long Boroko na bihainim Hubert Murray Haiwe i go daun long Taun na bihain go long Gavman Haus. Konedobu we Gavana Jenerol Sir Paulias Matane bai makim gavman na welkamim tim. *Lukim moa stori long pes 31.*

Ol paitman redi long Nesenel Kyokushin Karate Tonamen

Paul Zuvani i raitim

MOA long 60 paitman husat bai kam long Pot Mosbi, Rabaul na Kavieng i redi long kamap long 7th Nesenel Kyokushin Karate tonamen long Sir John Guise Indo Spot Kompleks long dispela Sarere.

Nesenel Kyokushin Karate opis long Pot Mosbi opis i tok Kavieng bai salim tripela paitman, Rabaul faiv na ol narapela paitman bai kam long narapela narapela klab o at olsem akido, sotoken, kikkboxing na taekwondo.

PNG Karate opis tok Lae na Kimbe i bin soim laik long kamap long dispela tonamen tasol long hevi bilong ron long balus ol paitman i painim hat long kam long Pot Mosbi.

Tasol ol i putim hop yet long dispela tupela senta long salim paitman i kam.

Pilaia registresen fi em K50.

Long holim nesenel taitol em Benroy, namba tu em Soari na namba tri em Brian Sammy. Most spirited paitman em Samson Bip.

Em i tok wina na ranap dispela sempionsip bai i gat sans long go pait long ol bikpela pait long narapela kantri we i gat trupela luksave na nem long ol.

Karate bodi kontekt na ol bai kamap aninit long lukaut na lo bilong Kyhocuchin Karate.

Bai i gat foapela jas long skelim ol pait na wanpela bilong dispela ol man em bipo sensie bilong Schnaublet Shihan Cameron Quinn. Quinn bai kam long Australia. Na wantaim Quinn em narapela sempion Karate paitman bilong Australia Mike Whitten.

Long taim ol i holim pait bilong nesenel taitol Schnaubelt i tok em i salim 20 tebol long ol koparet o bisnis haus long baim. Wanpela tebol em K2800. Em i tok mani em i kisim bai go long lukautim na kamapim skul bilong Karate long kantri.

Taim ol bisnis lain i baim tebol ol bai gat sans long lukim progress bilong manki ol i sponsorim. Dispela mani bilong baim tebol em bilong sponsorim ol sumatin. Miplea bai givim yu sumatin em yu sponsorim taim yu bai tebol. Schnaubelt i tok.

Dispeia em bikpela iven na mipela bai kisim ol kwalifaid dokta long was sapos hevi i kamap. Mipela i no inap kisim ol man nating long mekim wok, em i tok.

Em i tok ol paitman husat i laik pait i mas givim nem bilong ol long em long telepon namba 325 4537. Registresen bilong wan wan paitman em K50 na ol i mas baim bipo tete Septemba 2.

Get fi em bikpela manmeri em K10, ol yunivesiti na hai skul sumatin em K7 na ol manki aninit long 12 yia em K5. Ol i ken kisim ol tiket long Wally s Bar na Grill opis, Gordons.

I gat nupela Kumul skwat

Paul Zuvani i raitim

BAI i gat planti senis long PNG Kumul skwat we bai pilai wantaim Australia Kangaroo long Townsville long Oktoba 9 dispela yia, PNG Ragbi Futbol Lig jenerol menesa Joe Tokam i tok.

Em i tok nupela ol pilaia pilaia bai kam long Jon Sempionsip. Em i mekim dispela toktok bihain long planti ol pilaia bilong PNG Kumul skwat i no bin pilai gut o i no bin kamap long Jon traels we bai i helpim ol seletka long kisim ol.

Dispela i min olsem PNG Kumul kepten Mark Mom, Marcus Bai, Raymond Karl na narapela ol pilai bai i no inap stap gen.

Nau yet planti ol pilaia i stap long Australia o Ingran. Ol pilaia husat stap long Ingran em John Wilshere, Marcus Bai, Stanley Gene na Makali Aizuwe.

Tasol Tokam i tok dispela ol pilaia i inap kamap sapos klab em ol i pilai wantaim i larim ol long kamap na pilai.

Stanley Gene na Makali Aizuwe i soim laik long kamap. Marcus Bai bai i no inap kamap long wanem klab em i

pilai wantaim i go pas long Ingran supalig na olsem em bai i stap long presa long em i no inap long kamap na pilai.

Na tu mipela bai lukluk tu long ol pilaia husat i stap long Australia na makim PNG long pilai long Ragbi Lig Wol 7s tonamen long Sydney long Jenuari dispela yia, em i tok.

Ol pilaia husat i bin stap long PNG 7s sait long dispela tonamen em Lerory Day, Derek Fletcher, Steve Franciscus, Kevin Prior, John Reece (Brisbane), Kawage Gagma, Geno Kima, Ricky Sibia, Joe Sipa (Pot Mosbi) na Michael Marum (Rabaul).

Tasol long wankain Tokam i tok i gat bilip sampela bilong ol nupela lain i ken kamapim gutpela pilai sapos ol i stap long Kumul skwat.

Wanpela bilong ol dispela pilaia em man husat i gat save long planti pilai em Manam man Lerory Muriki.

Muriki bipo i makim kantri long long na hai jam na bihain stap olsem winga bilong PNG Pukpuk Ragbi Yunion tim. Em i lusim yunion na nau i pilai ragbi lig. Nem bilong em i stap pinis long Sauten

Jon skwat. Na tim bilong em Brothers i go pas long Pom Mosbi ragbi lig kompetisen.

Sauten Jon skwat em Nixon Nagle, John Wagambie jnr, Ricky Sibiyi, Romalus Mago, Lerory Muriki, Stanley Hondia, Geno Kima, Alex Aija, Charlie Wabo, Kawage Gagma, Pal Kamane, Andrew Norman, Johnson Kuike, Loa Sino (Pom Mosbi), Peter Wemin, Momoa Nuana (Koiari) na Igua Heni (Poreporena). Ol sedo pilaia em Nick Andy, Dickson Sibiyi na Peter Mond (Pot Mosbi).

Sauten Jon selekta em Billy Wartovo, Philip Batia na Heni Nou.

Hailans Jon skwat em Manzie Yere, Steven Pungun, Francis Ray, George Baker, Peter Noki (Mt Hagen), Kusiri Wong, Peter Danga, Nime Kapo (Goroka), Willie Amean (Wabag), David Rombuk, Nathan Anjo (Pogera), Luther Des na Lawrence Bana (Tabubil). Risev em Jonnie Toank, Wayne Warigiso, Martin Wilson, Sigfred Gande.

Kosa em Hans Kaybing, menesa Tella Wato na trena em Kiki Kaupa.

STRONGPELA TRU

Colgate

Toothpaste bilong PNG stret!

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.